

墨

緣

彙

觀

錄

圖繪之事其來久矣歷代名跡流傳於今者

曹衛如東晉隋唐五代之筆幸獲一二見焉

道故實人物界畫以及花木鳥獸諸作前賢各出心匠
位置高古無不盡其神妙山水自唐李將軍王右丞分
有南北二宗至荆關董元後北宋始爲全盛矣卓然傑
出者皆法右丞渾厚天真兼多士氣逮至政和間祐陵
究心繪事專以形似爲工傳之南宋二趙馬夏李唐輩
山水皆宗李將軍一派其人物花卉宮室鳥獸蟲魚院
人曲盡精思各生新趣雖極一時之選實乖古意是時

如米元暉江貫道獨法董巨楊補之趙子固又爲超軼者也至元趙文敏天資高朗學問淵深而留心翰墨不獨書法追宗漢魏晉唐其於繪事一掃院體習氣故釋道人物法唐人畫馬學韓幹山水師董元皆能深得旨奧其蘭蕙竹石小景之屬清韻拔俗所謂書畫之集大成者他如高房山黃子久王吳倪及元末諸公寄情畫道高妙絕塵雖其各立堂戶然多發脈董元故稱畫品中之神韻高逸者入明徐幼文王孟端劉完菴沈石田文徵仲皆宗之則又遠接衣鉢矣明末董文敏繼起華

亭秀潤天成不落蹊徑宗風爲之一變至我朝太倉
王奉常雅好筆墨收藏特富討論盤礴遂出王圓照王
石谷二子故吳下有三王之稱迄今知有倪黃董巨之
傳賴有於斯至於人物界畫鳥獸自元王孤雲張叔厚
王若水任月山之後鮮有繼者以致無傳厥後仇實父
名振吳門而於山水人物花木鳥獸臨摹逼真各得其
妙若其自運雖天資秀麗終難復古蓋因時代相感又
非學力不能爲也因彙畫錄畢聊述數語於前後之同
志者或有取焉松泉老人識

名畫上卷目

晉

顧愷之畫畫女史箴卷

隋

展子虔遊春圖卷

唐

李思訓江帆樓閣圖

戴嵩鬪牛圖

唐人摹六朝人觀鵝圖

五代

陸淝捕魚圖

關仝寒山行旅圖

董元風雨出鰲龍圖
瀟湘圖卷

趙幹江行初雪圖卷

北宋

李成讀碑窠石圖

范寬雪景寒林圖
雪山行旅圖

許道甯嵐鎖秋峯圖

燕文貴匡廬清曉圖卷 溪山樓觀圖

郭熙幽谷圖

宋迪秋山圖卷

文同秀石風竹圖

李公麟醉僧圖卷

王詵夢遊瀛山圖卷 煙江疊嶂圖卷

釋巨然雪圖 溪山蘭若圖

南宋

米友仁大姚村妹家所作雲山圖卷 瀟湘白雲

圖卷 雲山墨戲圖卷

趙伯駒江天客舫圖

趙伯驪萬松金闕圖卷

牟益擣衣圖卷

趙孟堅墨蘭圖卷

金

李山風雪杉松圖卷

元

錢選秋江待渡圖卷

梨花圖卷

來禽梳子圖

卷

高克恭雪橫秀嶺圖

趙孟頫雙松平遠圖卷 釋迦牟尼佛像 竹林

七賢圖卷

李衍竹梧蘭石四清圖卷

李士行古木叢篁圖

黃公望溪山雨意圖卷

曹知白十八公圖卷

吳鎮釣隱圖 梅松竹蕙四友圖卷 墨竹卷

江雨泊舟圖 墨竹坡石圖

柯九思清祕閣墨竹圖

王淵柳荷鴛鴦圖 摹黃荃竹雀圖

張渥九歌圖卷

唐棣朔風飄雪圖

朱德潤秀野軒圖卷

顧安歲寒竹石圖

倪瓚秋林山色圖 江岸望山圖 梧竹秀石圖

設色雨後空林圖 虞山林壑圖 清祕草

堂圖卷 竹枝圖卷

王蒙青弁隱居圖 雲林小隱圖卷 竹樹水石

圖 夏日山居圖

王冕贈雲峯上人墨梅圖

陳汝言百丈泉圖

趙原晴川送客圖

張中鵲鵠圖卷

釋本誠詩畫合卷

道鄒復雷春消息圖卷

明

宣宗松雪荷雀圖卷

王紱齋宿聽琴圖 秀石晴竹圖

劉珏清白軒圖

沈周廬山高圖 親知良晤圖 盤菊幽賞圖卷

春江送別圖卷

唐寅桐山圖卷 松坡高士圖卷 琢雲圖卷

高泉古樹圖 女兒嬌圖 孟蜀宮妓圖 山

靜日長圖冊

文徵明袁安臥雪圖卷 真賞齋圖卷 江山

霽圖卷 畫冊

仇英玉洞仙源圖 桃源仙境圖 秋江待渡圖

竹院逢僧圖 滄浪漁笛圖 空洞觀音圖

臨宋人山水界畫人物畫冊 臨宋人花果

翎毛畫冊

王穀祥水仙花圖

文伯仁江山蕭寺圖 秋山遊覽圖卷

陸治爲五湖畫卷 松壑閒居圖

項聖謨松濤散仙圖卷

董其昌關山雪霽圖卷 秋山圖 婉孌草堂圖

倣雲林山水圖 山居圖 倣楊昇沒骨山

水圖 山水簡冊 山水方冊 書畫小冊

書畫雙璧小冊

墨緣彙觀錄卷三

名畫上

晉

顧愷之書畫女史箴卷

絹本高七寸長丈許圖經真定梁蒼巖相國所藏大設色人物不及四寸色澤鮮豔神氣完足前作馮婕妤當熊二勇士持鎗迎護後作一山空勾無皴中着小樹山列猴虎之屬必子丑十二生肖上有日月照

臨後有一人執弩射雉次作班姬辭輦其後以及有
男女對坐於屏幃中者眾姬團坐者臨鏡梳粧者女
姬操管者筆法位置高古之極落墨真若春蠶吐絲
洵非唐人所能及也逐圖書箴八段楷法瀟古端嚴
卷尾款書顧愷之畫戲鴻堂已經刻石文不復載前
黃綾隔水墨書一行皆屬半字係前人編號後宋綾
隔水鈐朱文一押甚奇卷中有政宣紹興明昌諸璽
後有瘦金書自歡不可以黷寵不可以專起書箴一
段絹本十一行字大寸許必相國增入者後紙小字

三行項墨林書宋祕府所藏晉顧愷之小楷書女史
箴圖神品真蹟明墨林山人項元汴家藏珍祕卷多
項氏諸印外裝宋刻絲包首古玉出軸脂玉押籤甚
爲美觀

隋

展子虔遊春圖卷

絹本高一尺二寸六分長二尺四寸青綠重着色人
物五分許山巒樹石皆空勾無皴惟色渲染山頭小
樹以花青作大點如苔甚爲奇古真六朝人筆始開

唐李將軍一派圖中遊騎有四內一挾彈者湖心一舟乘女子三人一紅衣者前黃絹隔水半鈐御書瓢印宋祐陵瘦金書墨題展子虔遊春圖六字上鈐雙龍方璽中鈐一朱文舊印模糊莫辨下鈐宣和連珠大璽本圖後上角押皇姊圖書朱文大印乃元大長公主者又賈氏悅生葫蘆印後黃絹隔水上下鈐政和宣和小璽後半鈐政和連珠大璽下鈐封字大印連於宋綾隔水後紙有元馮子振趙巖張珪詩題其黃絹隔水有宋金華和馮海粟七言古詩一首楷書

深得黃庭樂毅之旨詩後書洪武十年孟春觀于奉
天門因和馮子振韻卷末董文敏跋云展子虔筆世
所罕見曾從館師韓宗伯所一寓目歲在庚午再見
之朝廷世兄虎邱山樓敬識歲月董其昌後押董印
其昌白文印

唐

李思訓江帆樓閣圖

絹本中掛幅長三尺闊一尺六寸二分青綠山水重
着色上作江天闊渺風帆泝流下段長松秀嶺山徑

層疊碧殿朱廊翠竹掩映具唐衣冠者四人內同遊者二人殿內獨步者一人乘騎於蹬道者一人僕從有前導者有肩酒餽之具後隨者行於桃紅叢綠之間亦可謂遊春圖傳色古豔筆墨超軼雖千里希遠不能辨其青綠朱墨傳經久遠深透絹背有入木三分之妙的係唐畫無疑宜命爲真蹟左下角押緝熙殿寶朱文大印元王叔明稚川移居圖太白山圖皆宗此法

戴嵩鬪牛圖

絹本着色中掛幅長二尺四寸闊一尺四寸五分水
墨二牛作抵觸奔鬪之狀畫左作老樹一株二牧童
驚避樹竇其樹有本無幹惟一小枝畫着綠大葉數
十片甚奇樹枯處上作一啄木鳥更爲奇絕筆法高
古唐人之作無疑畫接黃綾隔水上鈐宣文閣寶朱
文大璽畫右上角押朱文尙書省印右下角半鈐稽
察司印左下角押一古印文不能辨按周公謹雲煙
過眼錄云戴畫牛目凝紅此幅亦然

唐摹六朝人觀鵝圖

絹本中掛幅長二尺九寸闊一尺五寸二分此圖重
着色屋宇界畫用白描法山石地坡皆焦墨空勾以
大綠填染圖中一主人坐堂上一客對坐一童伸紙
一童執硯主人揮毫作書庭下五鵝貌鳴食狀旁繞
荷池花明葉茂後作湖面波紋若鱗對岸層山複嶺
平麓雲林朱橋梵宇耀人心目雖設色豔麗布景有
平淡簡遠之妙其叢竹樹葉茗花之屬皆似無骨法
爲之高古絕倫不落蹊徑大着色之作觀此止矣上
黃絹隔水董文敏題云唐畫儼六朝人筆七字正書

如錢款元宰二字下押宗伯學士白文印觀其傳色的係唐人所作當命之爲右丞余嘗見趙千里畫門泊東吳萬里船詩意小團扇雖宗此法古豔則不逮此幅右下角有趙氏家藏馭六心賞二白文印按米襄陽畫史載有大夫蔣長源畫着色山水內作凌霄花纏松元章目之爲佳作又見李伯時畫西園雅集圖小團扇元章題記有孤松盤鬱上有凌霄纏絡紅綠相閒之語今此圖有凌霄繞於喬木之上則知宋時蔣李二公之作所由來凌霄花卽茗花也

五代

陸滉捕魚圖

絹本中掛幅長三尺三寸五分闊一尺七寸青綠重
着色中作水面一舟上有二人長六寸許赤面虬髯
紅靴烏帽上罩箬笠內着緋衣一人刺篙一人捕魚
然非漁人未審何所取義其閒坡石空勾不皴以赭
綠填染又作墨石數塊甚精墨葦數莖秀勁有法右
上角空勾樹葉三層有葉無枝必是雙駢闊幅今存
其半黃絹隔水上下鈐雙龍方璽宣政長璽上隔水

宣和墨筆側題陸澠捕魚四字其大如錢筆法超逸
相傳巨然煙浮遠岫圖及余所見衛賢高士圖宣和
皆側題蓋當時屏幃闊幅俱分裝成軸取其便舒卷
故似橫卷題之按雲煙過眼錄此題定爲明昌誤矣
畫左下角有悅生圖書朱文方印此圖設色古豔用
意奇特真北宋以前物可稱神妙之蹟

關仝寒山行旅圖

絹本水墨山水中掛幅長四尺二寸二分闊一尺六
寸七分絹素厚硬神氣煥然中一大山高聳四面渾

圓其雄偉之勢令人駭目山石輪廓落筆有粗細斷續之分皴法加以水墨漬染其間山腰樓觀溪面橋梁茅屋野店雜以雞犬驢豕之屬客旅往來宛然真境上押天厯之寶朱文大璽畫右上角接絹押晉國圭章朱文大印右下角鈐稽察司半印悅生圖書朱文方印綾邊王覺斯題云關仝畫多縱橫博大旁若無人此頓精嚴步驟端詳或其擬項容郭恕先諸家歟文孫博學好古珍若天球不可輕褻也款王鐸爲文老親翁己丑十二月初三日此跋行書古雅字大

七分許因改宣和裱裝於軸桿然全畫余未之見此幅用筆_淳古氣韻深厚的屬南宗正派畫法不落北宋諸家蹊徑五代十人作無疑按米元章畫史云關仝畫樹有枝無幹此幅亦然

董元風雨出鰲龍圖

絹本雙駢大掛幅長五尺六寸一分闊三尺三寸水墨畫海水滿幅上餘空絹三四寸作有二鶴取其飛鳴九皋之意波濤視之如凸起狀水紋落筆粗分許加以粉染水面微顯龍首大三寸有奇龍背以墨暈

成或隱或現於雪浪之間不作怒張之氣可謂出人意表畫右下作一樹一石筆蒼墨潤具有風雨之勢此樹石一派後世惟梅花道人得其傳若夫氣韻深厚則不逮前人定爲北苑觀其樹石知爲真蹟無疑也絹素厚密神氣完足真希世之珍按宣和畫譜載有北苑風雨出鰲龍圖二水石吟龍圖一吳門顧維岳評此圖當以水石吟龍名之玩其龍之間靜良然上押宣文閣寶朱文大璽畫右上押晉國圭章朱文大印下角半鈐稽察司印畫左上押朱文晉府書畫

之印及朱文敬德堂圖書印又二印一清和珍玩白
文印下連乾坤清齋朱文印下角有一古印模糊莫
辨

瀟湘圖卷

絹本高一尺四寸五分長四尺餘着色人物五分許
山水以花青運墨不作奇峯峭壁皆長山複嶺遠樹
茂林一派平淡幽深具蒼茫渾厚之氣其遠近明晦
處更無窮盡人物開卷作二姝衣紫並立前一宮裝
女子回顧灘頭有樂者五人作樂而待江流一舟一

人着朱衣端坐一人擎蓋一人後侍一人前跪作啓
事狀前一人持簡後一人執櫓徐徐而來思翁跋稱
取洞庭張樂地瀟湘帝子遊詩意後段漁者十人共
布一網捕魚取次登岸甚爲奇古其沙汀葦渚閒數
艇隱隱觀之如覩真境余向見耿都尉家北苑夏景
山口待渡圖臨本亦是大卷其山勢皴法蘆荻沙汀
與此無二真蹟曾入元文宗御府後爲耿氏所收世
傳董源畫山多作麻皮皴惟此二卷俱用點子皴法
真登峯造極之作也此卷絹素完潔神采煥然傅色

古雅近於唐人前鈐一斜角舊印文不能辨下鈐稽
察司半印前引首藍箋董文敏勝題後綾隔水王覺
斯一跋後紙董文敏二題俱見卞氏彙考卷有睢陽
袁氏收藏諸印

趙幹江行初雪圖卷

絹本高七寸六分長一丈一尺淡着色卷前款書江
行初雪畫院學生趙幹狀字大如錢筆法蒼古其畫
布景精奇樹石極異通卷灑粉爲雪水紋勾畫纖勁
人物大小不一有行於長林雪隄者數人前一人乘

騎一人負物隨行後未度橋者二人策蹇前行二人肩擔隨後各具寒慄之狀黃蘆深處漁家老幼少壯捕魚之態摹寫殆盡其舟筏茅鋪罾網之屬無不備具前錦文黃綾隔水有御府瓢印金章宗墨題趙幹江行初雪圖七字仿宣和瘦金書上鈐明昌長璽下鈐明昌寶玩方璽前一半鈐舊印文不能辨下邊橫鈐稽察司半印卷中上押天厯之寶朱文大璽旁書神品上三字後隔水上下押御府寶繪內殿珍玩二璽後鈐羣玉中祕長方大璽後紙押明昌御覽大璽

此圖明昌七璽全備後列元季忽都魯都兒迷失趙
世延撒迪虞集朶來李洞沙刺班李納雅琥柯九思
張景先諸臣銜位後書天厯二年十一月日進入以
上名銜自左起往右排書拖尾接縫有白文吳瑞徵
印按趙幹初事南唐後始歸宋此卷題款稱畫院學
生者必待李氏時所作又累經宋金元御府鑒藏且
絹素完整真希有之蹟生平僅見者

北宋

李成讀碑窠石圖

絹本雙牋闊掛幅長三尺七寸闊三尺七分圖以水墨作平遠之景位置奇逸氣韻深厚樹木虬屈坡石蒼潤於林木平夷處作一大碑龜首如生其碑正面上首微有字形一人戴笠跨驪仰觀一童持杖旁立畫法高古得唐人三昧碑之側首小楷一行款書王曉人物李成樹石八字按成畫昔米元章見二本真蹟欲作無李論者因其人品最高不輕與人作畫故有是語蓋當時去李未遠所傳真蹟米老豈能盡見哉窺其意甚言其少耳後人恐忘爲稱許以致多有

泯沒然此幅非郭許可能方駕且款書朗朗考王曉
世無別蹟圖繪寶鑑云曉畫嘗於李成讀碑圖上見
之卽此亦可爲真蹟無疑矣右下角有一朱文半印
左下角有內方外圓一印及朱文孫承澤印考古人
合作之蹟宋人絕少此幀得具北宋兩名家世所希
有者當稱神逸奇妙之品向見三韓蔡氏所藏李成
觀碑圖較此遠甚亦是宋人之筆又見李唐魏武觀
碑圖雖真不免院體習氣

范寬雪景寒林圖

絹本三輯大掛幅長五尺七寸闊四尺七寸三分水
墨雪景其圖羣峯屏立山勢嵯峨筆墨位置蒼潤雄
偉山頭徧作寒柯通幅一無雜樹山石皆兩點皴爲
之下作大樹數重結林深邃後有村居一人張門而
望其山腰蕭寺危徑長橋水口沙磧皆得天真華原
生平之傑作且絹素完美上押御書之寶朱文大璽
宋畫中當爲無上神品

雪山行旅圖

絹本三輯大掛幅長五尺二寸四分闊四尺九寸款

曜州三源人范中立畫書于畫左山石之上水墨雪
景作兩山於畫邊左右斜出右高左低中空四尺有
奇具海闊天空之勢山頂多枯枝寒柯其平岡大嶺
皆古木長林樹作積雪盈枝復加粉勾背山樓閣隱
隱巖壑幽深一行行旅循橋而度趙松雪題寬畫謂
古今絕筆良不虛也此幅絹素熟厚氣韻沈着用筆
蒼勁布景奇絕虞山王石谷最稱許者可與雪景寒
林圖並馳昔太倉王奉常藏范寬大軸二幅以爲至
名之物有董文敏題跋嘗見石谷臨本其邱壑位置

已知不能敵此

許道甯嵐鎖秋峯圖

絹本中掛幅長五尺五寸二分闊一尺四寸七分水
墨作奇峯峭壁嵐氣如屏樹不爲皴枝似雀爪加以
潑墨大點爲葉山石輪廓皴法俱用焦墨直下山頭
樹木有用焦墨不作枝幹者長短不一直立如柱甚
爲奇絕山坳一人鞭驢步行雖其不求形似却得神
趣此幀必屏幃闊幅今存其一筆墨奇偉絹素完潔
上押一舊印模糊莫辨右上角有朱文乾卦圓印下

角有緝熙殿寶朱文大璽及稽察司半印左下角一印模糊下有王時敏朱文印是經太倉王奉常所藏上綾隔水董文敏排書許道甯真蹟五字款董其昌題下押董印其昌白文印

燕文貴匡廬清曉圖卷

白紙本高一尺有奇長四尺二寸水墨山水圖作重山疊嶂萬壑千巖其間樓閣崔巍林木叢密至於關山棧道屋舍溪橋水邊沙際舸艘漁舟皆得精緻更且墨氣穠古真神品也然界畫太工筆乏流動稍覺

版實前綾隔水王覺斯題云**淳**厚古雅超然時習之
外鼎彝難以絜重文蓀先生世寶順治六年上巳後
三日觀王鐸初識又一題己丑八月席上再觀重巘
涇嵐侵人眉字似入吾瀕水箕山王鐸又識卷前半
鈐舊印有四末下角有秋圃清賞朱文一印後綾隔
水鈐押六印後紙蘇文忠公題云軾通守錢塘日與
言外師游借此畫逾年將去郡乃題其後歸之今十
六年矣師云字爲人竊去復爲書此元祐四年十二
月四日眉山蘇軾後蔡卞一題云六年夏至日林希

子中王子淵微之邵材聖規梅灝子明王與道國蔡
卞元度同觀此二題皆行書甚精又一題云元符三
年九月二十二日謁言外得見燕貴山水并子瞻元
度真筆耳目爲之一清時發題此題草書亦佳三題
筆墨皆精紙色潔白此卷足稱書畫兼美者

溪山樓觀圖

絹本中掛幅長三尺四寸五分闊一尺四寸水墨山
水此圖山勢雄偉巖壑險峻其中梵宇閣道山徑溪
橋畫法與匡廬清曉圖無二行筆運墨更覺生動真

傑作也畫左於山石之上細書小字款翰林待詔燕
貴六字右上角押一朱文舊印模糊難辨下角半鈐
稽察司印前後有鑒家朱文二印

郭熙幽谷圖

絹本中掛幅長四尺九寸餘闊一尺六寸水墨山水
圖中山巖險峻谷中幽深山頭多作平頂上皆密樹
層林俱以潑墨大點爲葉二米多得其法至於山之
輪廓皴法全用淡墨渲運其虬屈老樹兼有重墨爲
之者秀潤天真清氣逼人非盤車驟網之作可比且

絹素完美此圖必屏幃大幅今存其一上押一朱文
大印模糊莫辨右上角有朱文一印內剝落一字惟
存永皇極三字下鈐稽察司印又一腰圓舊印左上
角一朱文舊印模糊文亦難辨下角有張則之朱文
印又見河陽窠石平遠圖一軸雙駢絹本水墨大掛
幅絹素完整樹木虬屈石用捲雲皴畫右小字款書
風雲窠石平遠圖壬戌歲郭熙畫字甚澁古經耿都
尉家所藏者生平所見郭畫以此二幅爲無上之品

宋迪秋山圖卷

絹本高九寸七分長一尺八寸有奇水墨山水師李
成後袁華跋中謂寫輦洛之景有宋高宗題識此圖
氣韻蒼茫意趣簡遠有惜墨如金之妙前宋綾隔水
鈐押大小舊印三方本圖前上角半露一小印下角
押一朱文大印文皆難辨卷中上押瑤暉畫府朱文
大印後綾隔水鈐悅生胡蘆賢志堂等印隔水接連
後紙鈐朱文奉華堂印下鈐朱文封字大印王覺斯
一題云靜深元澹巨然同一根矩己丑十二月王鐸
爲北海老詞社題世世寶藏此題字甚淳古後押朱

文瑤暉堂印又張紳袁華倪瓚高啓王彝張適謝徽
王行陶振張洪題識考復古真蹟近世所傳絕少不
過一二數也此卷且有奉華瑤暉印章及元末諸公
題詠宜爲宋人畫卷中之錚錚者跋云有宋思陵題
識今已無存卷經孫退谷少宰所藏

文同秀石風竹圖

絹本中掛幅長三尺八寸八分闊一尺八寸水墨寫
竹三竿以濃墨爲葉妙具急風之勢似有蕭瑟之聲
下作平坡旁立秀石輪廓皴法全以淡墨渲染真逸

品也右下角半鈐稽察司印左首蘇文忠公題云風
稍雨籜上傲冰雹霜根雪節下貫金鐵誰爲此君與
可姓文惟其有之是以好之此題雖未書款觀其用
筆蒼勁之妙知爲真蹟無疑

李公麟醉僧圖卷

澄心堂紙本高九寸六分長一尺八寸人物稍加赭
色渲暈餘用白描法其中一僧坐石於古松之下面
貌奇偉微含醉態執筆作書左手按膝一童伸紙於
前松幹懸一葫蘆石上旁陳硯墨卷前二人作相顧

狀一人雙手擎酒瓶前行一人左手提瓶隨後描寫
人人送酒詩意神情生動超然絕俗更兼樹石蒼勁
衣褶妙若游絲真龍眠之佳作末角小楷書款李伯
時畫四字卷前橫鈐稽察司半印後有董姓二印余
見白描畫卷不下十數皆以龍眠呼之惟平湖高詹
事所藏盧鴻草堂十志卷瀟湘圖卷與耿都尉家三
馬圖卷皆無疑議瀟湘圖水墨山水乃自成家法氣
韻有餘筆下似覺妍弱三馬圖得有蘇文忠題贊畫
法亦非伯時得意之筆二卷雖真殊不滿意此卷非

獨畫法高妙且有老泉臨藏真人人送酒不曾沽一
詩深得素師奧旨實爲雙璧後有宋人一跋云唐僧
懷素以草書名天下唐賢善書者亦推重之素有自
序一篇備載諸人之詞素渙喜絹書吾家前後所得
數軸了無紙上一字最先所得乃人人送酒之詩也
老泉山人學書垂四十年每愛此詩時時寫之不下
數十張矣龍眠李伯時因是詩遂作此畫頗能狀醉
僧之態而老泉所書自成一種風格所爲二妙圖耳
東村閒居方外堂字灸書

此灸字難考或今文二字

後有寬邊一

朱文舊印末尾有鑒古齋雅玩五字卷經項氏家藏
有項元汴氏審定真蹟桃花源裏人家等印其印繁
多故不盡錄

王詵夢游瀛山圖卷

絹本高七寸三分長四尺二寸有奇青綠山水大着
色山頭多宗李成落墨法唐人空勾以青綠填染復
用重色細皴後至南宋二趙元錢舜舉皆宗此法開
卷作山村茅茨遠水平沙其間數艇隱隱捕魚中流
圖中多絕壁層巒茂林梵宇凡村居多作木柵屋舍

窗牖牆壁皆以粉染甚覺古雅後一遠峯上書蠅頭
小楷四行題云保甯賜第王晉卿瀛山旣覺因圖夢
中所見甲辰春正月夢遊者此題楷法精嚴又兼畫
法高古宜稱海內名蹟在明曾經項篤壽家藏按董
文敏容臺別集云項氏不戒於火已歸天上噫文敏
豈知仍在世閒耶是時必有神物護持不致泯滅卷
前下角有白文舊印難辨又半鈐朱文篤壽連珠小
印後有蘭石半印後紙半鈐封字大印有南宋人田
亘題七言絕句一首後又跋云王晉卿圖瀛山筆畫

精綴京師貴游蓄之爲希代之寶貨圖書棄擲于路

寶貨二字上文氣不順似有遺失

陽翟張飛卿見而得之過九江以

遺友人傅延之延之出以示余余悲而賦詩建炎初

元九月廿八日陽翟田亘元邈此詩跋正書字大寸

半學柳誠懸又紹興閒陳章漢卿一跋後押三印又

袁立儒七言絕句一首後款建人袁立儒題駙馬都

尉所作夢游瀛山圖後押朱文園谷及水竹家大小

腰圓二印又董文敏一跋云王晉卿瀛海圖載宣和

畫譜有宋人題跋米元章所謂青綠設色類補陀巖

用李將軍海岸圖法高出趙大年伯駒之上良由與
蘇米山谷輩爲友自然脫去畫史習氣董其昌題後
押元賞齋白文一印又胡世安一跋卷中有篤壽雲
煙過眼蘭石主人項子長等印前藏經紙標籤董文
文敏題宋王晉卿瀛海圖七字

煙江疊嶂圖卷

絹本高九寸二分長三尺八寸九分青綠山水畫重
山大嶺陡壁層巖山多平頂全以花青運墨點苔甚
爲奇古有渾厚天真之妙雖其發源李成布景如城

郭村落梵宇浮圖茂樹垂楊客舟江艘各具精妙實
自成一家爲晉卿之傑作真蹟無疑鳳洲跋謂歌辭
與畫境小牴牾者蓋因圖中乏煙雲變滅不當爲煙
江耳嘗見晉卿煙江疊嶂圖一卷後爲商邱宋氏所
得上有宣和標書及宣政小璽後有姚樞宋濂黎民
表題乃高長大卷惜絹素破裂然邱壑奇奇山多飛
泉具有江霧濛迷之景的爲晉卿煙江疊嶂却無蘇
題是時禁蘇文或經截去此卷前宋綾隔水首押雙
龍方璽後有蘇文忠書歌白紙本紋如琴斷行書二

十三行書法精嚴歌前題云書王定國所藏王晉卿
畫煙江疊嶂圖一首歌後書元祐四年三月十日上
蓋趙郡蘇氏朱文大印又行簡老人梧山遺老葉圭
三人詩題又王世貞和東坡原韻并題後有辛卯七
月徐益孫陳繼儒鑒記又萬厯乙亥春晦張九一九
二觀於元美御史府中章草書又隆慶壬申孟冬廿日
南海梁孜共觀於心遠堂又萬厯癸酉孟秋一日穎
川陳演同黃潤甫姚大有敬觀於大江之清谿隸書後
有王世貞一題有太僕寺印大方印撫治鄖陽等處

關防長方印又萬厯丙子夏五月王世懋載觀於鄖陽之清美堂又丙申六月望前曹子念重觀於碧鮮館又文嘉一跋後有張鳳翼和韻并題及俞允文一跋又萬厯壬辰孟冬望後一日長洲章藻鑒記卷中舊印繁多以及王氏收藏諸印

僧巨然雪圖

絹本中掛幅長三尺四寸一分闊一尺五寸五分水墨奇峯積雪峭壁飛泉松杉蕭疎梵宇虛曠山坳一人肩擔踏雪村歸一人乘騎一人隨後行於山麓溪

橋沙水甚得簡遠之致山頭從上至下全以焦墨直
皴樹多欹曲之勢坡石微用捲雲法與李咸熙同一
眷屬筆墨位置蒼秀奇逸宋畫中之高妙者董文敏
題爲巨然必有所由來其絹素如新神彩奕奕畫右
下角半鈐稽察司印左下角押緝熙殿寶大璽下又
二古印文不能辨上藏經紙詩塘董題巨然雪圖四
字疑董其昌鑒定下押宗伯學士董氏元宰二白文
印乃太倉王煙客所藏後歸昆山徐氏憶甲午歲十
二月余在吳門時久雪初霽顧維岳從玉峯攜來與

玉石谷同觀於吳江舟次

溪山蘭若圖

絹本中掛幅長五尺四寸六分闊一尺六寸八分水
墨大山滿幅煙霧濛迷梵宇幽深茂林叢密山頂多
積礬頭輪廓皴法全用淡墨長麻皮皴直下坡石沙
脚渾若天成林下一亭閒寂山頭水際皆以重墨大
點爲苔壯如瓜子此幀筆墨淋漓氣韻沈着脫盡李
成郭許蹊徑厥後江貫道得其正傳元季諸公又遠
接衣鉢矣按宣和畫譜載巨然所畫溪山蘭若圖又

煙浮遠岫圖各有六幅此圖右上首有巨五編號必是屏幃第五考溪山蘭若鑒家諸書未及記載惟煙浮遠岫上有宣和標題高氏江村銷夏錄顧氏平生壯觀錄俱經詳載其中所注長短闊狹山頭皴法林木位置與此相彷彿或煙浮遠岫之一未可知也煙浮遠岫向藏松江王氏惜未一見然此幅精妙淳古真蹟無疑且絹素完美上押一朱文大印右上角鈐一舊印皆模糊難辨又半鈐稽察司印下角有吳廷印章經吳江村所藏者余凡見巨然所作如萬木奇

峯山溪高隱等圖皆不及此其萬木奇峯雙駟大幅
曾在耿都尉家後歸商邱宋氏或以董元稱之其山
溪高隱的係南宋人筆又見耿氏一幅亦雙駟大軸
氣韻不古是元人高手此圖令人心降當爲監家至
寶

南宋

米友仁大姚村妹家所作雲山圖卷

絹本高一尺二寸八分長四尺二寸餘水墨雲山筆
法蒼潤氣韻渾成山巒坡石之輪廓皴法得北苑三

昧至於山頭積點煙樹渾濛皆雲氣空勾自成家法
實以煙雲爲粉本者神逸而兼淳古一變畫家習氣
超凡絕俗宜乎世有米家雪山之稱卷前上首自題
詩款行書九行其詩霄壤千千萬萬山東南勝地熟
躋攀古來作語詠不得我寓無聲縑楮閒紹興己未
除守琅琊待次平江寓居大姚村妹家戲作懶拙翁
元暉下押元暉白文印此卷曾入元文宗御府上押
天厯之寶朱文大璽前後下角印痕難辨後有吳寬
王鼐陸完三跋世傳元暉別有大姚村圖乃紹興戊

午所作沈石田曾爲臨仿未得一見

瀟湘白雲圖卷

白紙本高八寸二分長八尺六寸雲山滿卷全用淡墨爲之稍加重墨點運一派濛濛之景樹木蕭疎其雲氣以淡墨細勾山頂浮圖溪橋屋宇在隱顯之間超妙絕塵變態無盡宜稱海內名卷下脚通長留餘紙寸許不作筆墨以防裁割其自鄭重如此引首董文敏勝跋行書甚精卷前下角有衛青白文印後款元暉戲作四字下角押元暉白文印前後有瑞文圖

書朱文半印以及周廣翰諫節從義清白傳家賢志
堂等印接縫處有布衣史氏白文印後紙自題三十
五行款懶拙老人元暉款右拥友仁朱文印又關注
謝伋韓許錢端禮洪适曾_淳又錢端禮曹筠等題後
又自題十四行款懶拙老人米元暉書此前後二題
行書大寸許雄偉峻拔不失家法又洪邁尤袤二跋
後袁說友一跋並詩款下拥建安袁氏白文印又錢
聞詩朱敦儒朱熹曾惇洪适錢端禮曹筠溫革林仰
處和父洪邁朱熹尤袤等題又袁說友隸書及錢聞

詩二跋其後時佐隸書一跋下押滕國時氏朱文印
紙末有齊郡張紳小楷書一行後有王彝常宗楷書
考瀟湘圖中題跋者甚精詳簡畧字法亦佳惜其不
全末後沈啓南一跋內有年已七十有五始得一觀
之語卷有項氏諸印及江村吳廷之印外籤董文敏
題宋兵部侍郎米元暉瀟湘白雲圖宋諸名公跋附
此卷曾經文敏所收每見其圖畫跋語中往往及之

雲山墨戲圖卷

澄心堂紙本高六寸五分長五尺七寸有奇此圖長

墨緣彙觀錄卷三

三

粵雅堂叢書

山複嶺路徑縈迴坡石渾成林木蒙密山石全法董源雲氣淡墨細勾其梵宇溪橋煙村人犬無不曲盡其妙以前所錄元暉二卷布景不能如此之勝又見茗溪春曉一卷雖稱名卷較此三圖遠甚且無款識此卷前自題行書四行於上云余墨戲氣韻頗不凡他日未易量也款元暉書字大五分許甚佳卷首押芝山朱文葫蘆印前上角半鈐一舊印莫辨下角有小谷朱文連珠印朱輝家藏朱文印後段上押一朱文大印文難全辨末上角有朱文蘭隱大印卷前後

紙邊半鈐朱文至樂軒三字後紙有標籤一條墨書
至樂軒畫卷妙品第三貼於後綾隔水之後下鈐劉
珍庭玉劉氏家藏朱文三印後董文敏一跋云米元
暉山水卷皆爲元高尙書所混卽余收瀟湘白雲長
圖宋元名公題詠甚富沈石田以晚年始覲爲恨余
猶疑題詠雖真似珠璣耳神物或已飛去不若此卷
之元氣淋漓布景特妙也丙子六月三日其昌題後
押宗伯學士董氏元宰二白文印又馮涿鹿一跋卷
有新安吳希元等印

趙伯駒江天客舫圖

絹本橫方掛幅高一尺二寸五分闊一尺四寸五分
青綠山水大着色落墨纖勁取法唐人傳色古豔兼
用泥金渲染圖作江天闊渺之景波容宛若細鱗石
下角作坡陀平岸密柳濃陰其間水閣幽深紙窗高
掩下泊客舫內有朱衣者對岸五峯聳立飛鳥成行
蓼花菰草於沙渚水際之間精妙絕倫右首押沐府
圖書白文大印圖上有絹本大團幅高一尺二寸八
分闊一尺四寸宋高宗題山谷五老峯前萬頃江女

兒浦口鴛鴦雙驚飛何處沙上宿夜雨釣船燈照窗
詩一首行草筆法蒼古大如小拳後押德壽殿御書
寶朱文大璽前押黔雷世家白文大印左下角有朱
文紹勳葫蘆一印又見千里採芝小方幅大着色全
法董元左下角有吳氏珍玩朱文印以及項子京張
則之等印與此可稱雙玉

趙伯駒萬松金闕圖卷

絹本高八寸餘長四尺青綠山水開卷作海天杳渺
日映青霞高松數株羣鶴翔集圖中遠峯層立山勢

重疊不作輪廓皴法全爲萬松用淺綠橫掃又以橫
豎苔點積成山頭雲氣復加花青運墨點染以分遠
近明晦其法大似北苑元暉一派山坳曲徑以泥金
渲暈更爲新奇金闕用沒骨法勾金傳色而成顯於
萬松之表松間加以紅桃相映其碧橋朱欄亦不落
墨惟山脚沙灘皆設重色以泥金稍加皴染後作白
鷺一行山鵲飛鳴大松三株欹斜有致此圖設色布
景全法大李將軍筆法氣韻若董元山勢點苔類小
米乃畫卷中之奇品生平僅見者前後舊印有六模

糊莫辨後紙趙文敏行書一跋云宋南渡後有宗室
伯駒字千里弟伯驥字希遠皆能繪事尤精傅色高
宗作堂處伯驥禁中意所欲畫者輒傳旨宣索此萬
松金闕圖斷爲希遠所作清潤雅麗自成一家亦近
世之奇也孟頫跋又倪雲林題詩云萬松金闕鬱嵒
嵒望望人間思沈家留得前朝金碧畫仙人天際若
爲招倪瓚王子春後又齊郡張紳一跋下押士行父
朱文印又見李唐萬松金闕圖絹本雙駟掛幅雖精
然不及此

牟益擣衣圖卷

白紙本高八寸長一丈三尺七寸餘水墨白描法龍
眠人物學周昉描寫詩意曲盡閨房之態其中叢菊
寒鷺屋宇高欄砧杵器具布置得宜各具臻妙圖內
畫有二屏上作水墨山水深得龍眠瀟湘圖法秀潤
超逸知其不名一家者也惜其傳世絕少卷首押董
氏朱文三印本圖後董良史楷書謝惠連擣衣詩共
十行書法甚佳後有董氏適適堂奇蹟長方印書帷
寶繪鼎印洪董史章董史祕貺二方印四印皆朱文

後紙德新自跋二次行書共三十二行筆法清勁古雅又集句七言詩一首行楷甚精後押董氏三印又曾鼎黃渠詩跋黃慶摺紳二跋習韶張峻詩跋後高江村三題昔見紙本白描幽風圖一卷畫法精妙紙之質色亦與此卷相類題爲龍眠然鑒賞者亦多以龍眠目之苟能見此則知爲德新矣

趙孟堅墨蘭圖卷

白紙本高一尺長二尺五寸餘作淡墨幽蘭二本於平坡叢草之間覺清氣侵人筆法飛舞後自題詩云

六月衡湘暑氣蒸幽香一噴冰人清曾將移入浙西
種一歲纔華一兩莖款彝齋趙子固仍賦下柙子固
寫生白文印石首有顧敬詩題字甚古拙後紙有文
徵明王穀祥朱曰藩周天球又周天球彭年袁褱陸
師道詩跋此卷有衡山父子印章爲文氏所藏者觀
此則知衡山所作蘭蕙從此得來可稱逸品

金

李山風雪杉松圖

絹本高八寸八分長二尺三寸有奇水墨雪景氣韻

渾成得荆范遺意山多直峯作長松杉樹離院修竹
茅茨一人擁爐而坐後一草亭半露其樹石水口用
筆若不經意縱橫有法葦渚沙汀得淡遠之致世傳
惟此一卷圖前款平陽李山製五小字上蓋平陽腰
圓白文一印後紙有王黃華詩題行書字有寸半許
大小相間筆法超逸類李太白上陽臺帖其詩繞院
千千萬萬峯滿天風雪打杉松地爐火暖黃昏睡更
有何人似我慵後自題云此參寥詩非本色住山人
不能作也黃華真逸書書後客至曰此賈島詩也未

知孰是後王萬慶一跋云此老在泰和閒猶入直于
祕書監予始識之時年幾八十矣而精力不少衰每
于屋壁閒喜作大樹石退而睨之乃自歎曰今老矣
始解作畫非真積力久功夫至到其融渾成就處斷
未易省識今觀此風雪杉松圖其精緻如此至暮年
自負其能亦未爲過而世俗豈能真有知之者故先
人翰林書前人詩以品題之蓋將置此老于古人之
地也覽之使人增感云癸卯六月廿有二日萬慶謹
書考萬慶史作曼慶號澹游王黃華庭筠之子也余

顧氏嚴氏等印

元

錢選秋江待渡圖卷

淡黃紙本高八寸長三尺一寸餘金碧山水大着色
作紅樹青山山之輪廓皴法樹石屋宇舟艇全法王
晉卿瀛海圖其山石樹木有不落墨處兼以沒骨法
爲之人物長四分許一人乘艇垂釣於蘆葦之間中
流一舟對坐二人一作回顧狀船後一人刺篙撐渡
對岸一人挾傘以待此圖設色豔麗意趣簡遠舜舉
之佳作後自題詩云山色空濛翠欲流長江浸徹一

天秋茅屋落日寒烟外久立行人待渡舟款吳興錢
選舜舉畫并題後押舜舉印章白文印舜舉朱文印
白文錢選之印紙末上下角有陳氏二印後紙有陳
恭胡惟仁朱庸胡敦倪可與烏斯道劉中正魯鄧宇
池貞青華子陳琳察伋雲林叟人龔輔謝表十六人
詩題及高江村和舜舉原韻一首嘗見舜舉所作青
山白雲山居圖蘭亭觀鵝圖二卷皆不及此又自畫
浮玉山居圖卷山皆水墨淺色惟樹葉以綠色爲之
甚爲精雅奇逸後有仇遠黃公望顧阿瑛鄭元祐張

雨倪瓚等題爲明姚公綬所藏者與此可稱雙美

梨花圖卷

白宋紙本高九寸三分長二尺八寸餘作設色梨花
一枝風姿飄逸口口口口口口口口口口口口口口
口口口口口口口口口口口口口口口口口口口口口
欲暗時款雪谿翁錢選舜舉後押選舉印章白文印
舜舉朱文印白文錢選之印白文雪谿翁錢選舜舉
畫印卷首有錢氏白文印下有太監王誥收藏書畫
朱文印項氏貽字編號卷末上下有駙馬袁氏收藏

朱文印內多項氏諸印以及文徵明文彭等印後紙有馬黼吳仲莊袁輔夏伯寅朱璠陸豈大興詩題王紳一跋又悅禪檀隱潛老章溥鄭玉周雍晏昱又晏昱楊魯范彥良道遐師鑒詩題凡十八人

來禽梳子圖卷

白紙本二方幅每幅八寸五分作來禽梳子二枝設色淡雅咸有生趣不款末角有舜舉朱文印前鈐白文主人半印後綾隔水趙文敏一跋行書精妙題云來禽梳子生意具足舜舉丹青之妙於斯見之其他

瑣瑣者皆其徒所爲也款孟頫後押朱文趙字印趙氏孟頫白文印趙氏子昂朱文印

高克恭雪橫秀嶺圖

絹本大掛幅長五尺三寸五分闊三尺一寸二分淡着色此圖山勢嵯峨羣峯拱立橫雲迷嶺水口濛渾林閒一亭閒寂樹木叢密處茅屋微露在隱顯之間氣韻蒼茫淋漓渾厚誠得董米三昧余見房山所作以此當爲第一評者謂與趙吳興並馳良不虛也右首鄧文原跋云往年彥敬與僕交極厚善嘗見作畫

時真如蒙

字缺一

所謂痴癡承蜩者蓋心手兩得物我

俱忘者也此卷擬董元尤得意之筆

字缺半

原不可復

作矣令人雪涕鄧文原題下押朱文素履齋一印左

首李息齋題予謂彥敬畫山水秀潤有餘而頗乏筆

力常欲以此告之宦遊南北不得會面者今十年矣

此軸樹老石蒼明麗灑落古所謂有筆有墨者使人

心降氣下絕無可議者其當寶之至大己酉夏六月

薊邱李衍題下押二印模糊上綾隔水王孟津一跋

字兼隸法大寸許甚爲古雅題云高尙書畫神氣淋

漓岷峨滋長展曰造化從毫天地無功又行書款丙
戌正月十三日同汴梁張雪齋憲副觀于燕山王鐸
後押王鐸之印煙溪漁叟白文二大印下綾隔水王
覺斯又題云日對此幀如坐瀝水傍觀少室諸峯何
知人世繁華封疆金革之事丙戌王鐸又跋爲二弟
仲和憲副時年五十五下押王鐸朱文連珠小印

趙孟頫雙松平遠圖卷

白宋紙本高七寸八分長三尺一寸五分水墨山水
法河陽用筆清勁布景簡略作長松二株怪石荊棘

坡陀沙磧各得其妙隔岸遙山平野中流垂釣一舟
有淡遠之趣卷前款題子昂戲作雙松平遠行書兩
行八字下押趙氏子昂朱文印卷末又題僕自幼小
學書之餘時時戲弄小筆然於山水獨不能工蓋自
唐以來如王右丞大小李將軍鄭廣文奇絕之跡不
能一二見至五代荆關董范輩出皆與近世筆意遼
絕僕所作者雖未敢與古人比然視近世畫手則自
謂少異耳因野雲求畫故書其末款孟頫後鈐朱文
趙孟半印行草甚佳後有楊仲宏七言古一首款題

松雪翁爲野雪憲椽董君作山水襲卷浦城楊載賦
後押楊氏朱文三印後又番陽童軒一跋爲成化閒
內監錢能王跋者此卷本身前有黔甯王子子孫孫
永保之白文印楊遵之印白文墨印及長宜子孫楊
氏法書名畫妙不可言等印後有清白傳家超凡絕
俗二朱文印

釋迦牟尼佛像

絹本小長幅長二尺闊一尺一寸有奇寫番像如來
一尊慈容廣照露頂赤足耳墜大鐙身著紅衣一肩

袒裼手執如意寶筵坐於盤石之上設色古豔全法
唐人得其三昧後款弟子趙孟頫畫下押趙氏子昂
朱文印畫右首有倪雲林題贊首書釋迦牟尼佛贊
其贊云稽首無上具足尊無人我眾生壽者千偈瀾
翻了無訛拈花傳燈長不夜款無諍居士寶雲庵主
懶瓚敬述下角有王氏嚴氏等印又松雪畫龍王禮
佛圖大幅重着色山水法董源佛像龍神俱法唐人
原經耿氏鑒藏後歸於余今歸祥符宋氏又松石老
子圖大着色亦法唐人真定梁氏物今歸吳門一士

紳家與此可當並傳

竹林七賢圖卷

絹本高七寸七分長五尺餘全以水墨細竹爲林地
坡用墨渲運竹學蘇文忠人物淡着色法唐人七賢
皆席地而坐吟詠閒適其閒陳錯筆硯及酒果罇罍
於前童子四人內一捲書卷者卷首押趙字朱文印
下有季方朱文小印又三舊印模糊後款子昂下押
趙氏子昂朱文印此圖高古奇逸世所罕覩爲翁著
意之作凡余所見古人作畫設色而兼水墨者如張

萱唐后行程圖大着色竹樹以墨爲之闊立本職貢
圖徐熙雛鶻藥苗圖俱大設色其地坡野草皆用墨
爲之觀此三圖故知文敏作畫之由來所不滿意者
惜無題識雖具坦齋一跋乃卞氏增入難免續貂

李衍竹梧蘭石四清圖卷

白宋紙本高尺餘長一丈六寸有奇水墨作畫開卷
二石氣韻圓渾得北苑遺脈竹法清健蘭葉飄逸竹
間老梧二株以潑墨爲葉筆墨淋漓之妙不踈徑真
士夫之作也畫後紙空三尺有奇自題大德丁未秋

九月王元卿道錄送至此紙求予拙筆事多未暇明年正月一日始得了辨燈暗目昏白日視之不知何如也息齋道人薊邱李衍仲賓題後押李衍仲賓白文印息齋朱文印此題行書字大寸半後紙有周天球一跋曾經項氏及李氏鶴夢軒收藏

李士行古木叢篁圖

絹本雙駟大掛幅長五尺一寸闊三尺餘水墨古樹虬曲枝如鷹爪竹石清勁絕俗坡陀細草各得其妙筆蒼墨潤可稱逸品畫左題款一行薊邱李士行遵

道作字大寸許下押朱文李士行印李氏遵道白文
印游戲翰墨朱文印右上首有七言古詩一首款天
台釋智彌題圖之左右有收藏二印模糊難辨

黃公望溪山雨意圖卷

白宋紙本高八寸七分長三尺一寸有奇水墨山水
筆法蒼潤墨氣渾成雖發脈畫米實自成家法者圖
作野岸高松溪山烟樹後有遠山先用淡墨空鈎筆
力圓潤復以淡墨渲染又一遠山皴染數筆有天眞
之妙余見子久富春山圖遠山亦有如是者此圖與

富春山卷並傳於世富春山圖邱壑差勝然紙質鬆
粗氣韻稍乏耳此卷後自題云此是僕數年前寓平
江光孝時陸明本將佳紙二幅用大陀石研郭忠厚
墨一時信手作之此紙未畢已爲好事者取去今復
爲世長所得至正四年十月來溪上足其意時年七
十有六是歲十一月哉生明識下押黃氏子久白文
印朱文黃公望印末下角有文壽承氏朱文印前藏
經紙引首文彭篆溪山雨意四字款文彭下押文壽
承氏朱文印三橋居士白文印舊綾隔水下有秉字

編號鈐朱文南村珍玩及朱文京兆郡圖書印後黃
絹隔水王國器題詞寄菩薩蠻者上下鈐有朱文京
兆連珠印南村朱文印後紙倪瓚跋云黃翁子久雖
不能夢見房山鷗波要亦非近世畫手可及此卷尤
其得意者甲寅春倪瓚題後接縫鈐京兆朱文連珠
印松陸史氏邦俊家藏朱文印及項氏李氏鶴夢軒
等印

馮子振十八公賦曹知白補圖卷

右圖絹本高一尺三寸五分長二尺八寸水墨作奇

松一株地坡數筆其松一本十六幹挺拔蒼秀層疊盤鬱天然位置得宜全無偏欹回憶天地生物造化之妙如此樹本一款曹知白畫四字卷首押皇姊圖書朱文印真澹朱文印永文都省書畫之印後馮海粟爲賦首書十八公賦并序次行書前集賢待制承事郎馮子振撰其序云長城之北又數百里馳上京東北百數十里爲蹕林環林四向皆斤磧沙嶂松低昂掩冉殆且千萬而未有數所爲古八百里松林者也又數十里爲孤驛松一根十八幹共挺挺植立項

傾撐矗勢各合抱不令參差高下大小不齊少分魄
色於其間氣岸磅礴大似老人大父行下視蒼岡翠
麓或偃或怪各端睨嚴事无敢抗行東西行者例以
十八公尊稱之莫有能口講指畫使人悠然意會者
心每悵然頃年十八幹之二幹戕於操斧入林之夫
其人旋斃則神物之訶護由來久矣今十六幹巋然
昂霄其二幹斧瘢亦自小小突兀大德壬寅把茷後
三日子道應昌始一再過之歎其崛奇壤傑有如此
者無論南北萬里殆九州之表六合之外自有宇宙

以來未之有也其還薊京也語方外客盧生曰吾行
諸方四十年所見五大夫之魁梧礪魄何算未嘗見
十八公之真面目如此公之真爲十八公者生其爲
我圖之生欣然爲貌其韻度悉緣吾言如此其驛亭
沙塞荒寒寥落之狀種種甚似觀是圖者便應彷彿
敕勒川皋蘭下當亦慨然重太息於予之慕遠游而
廣離騷也遂爲之賦其賦詞藻奇偉洋洋灑灑凡數
千言難以盡錄書法筆力峭逸有疾風驟雨之勢可
稱奇品後有鄧善之七古一首款集賢直學士鄧文

原又趙秋巘七律一首款趙巖下押魯瞻朱文大圓
印按馮序松囑方外盧生繪圖今卷中乃雲西筆而
序內未經語及然盧無畫名此圖首有皇姊圖書印
考元大長公主凡所藏名書畫皆命馮子振趙巖張
珪等題識其見重如此是知此賦爲主所收且盧生
非高手或命雲西補之將盧圖易去耳余又見海粟
居庸賦紙本高長大卷其賦亦數千言爲靜春書有
鄭元祐宋濂題

吳鎮釣隱圖

白紙本中掛幅長四尺三寸闊一尺七寸餘水墨山水此圖雙松高挺古樹欹斜下作坡陀菰草中段湖心一艇一人持竿作釣上有一山自畫左斜出筆法蒼潤雄偉用墨渾厚淋漓山凹沙際皆以重墨大點爲苔壯如瓜子全法北苑得其三昧者圖上題漁父詞一首草書精奧其詞洞庭湖上晚風生風攪湖心一葉橫蘭棹穩草衣新只釣鱸魚不釣名款至正元年秋九月梅華道人戲墨後押棹華盦朱文印嘉興吳鎮仲圭書畫記白文印畫左松旁又款梅華道人

戲墨後押棣華盒朱文印嘉興吳鎮仲圭書畫記白
文印畫四角押項氏諸印曾經墨林收藏向見仲圭
所作源頭活水一圖水墨紙本其長短闊狹與此相
彷彿筆墨高妙法董巨二圖可稱雙玉

梅松竹蕙四友圖卷

白宋紙本高一尺長一丈四尺有奇水墨作梅松蕙
各一段竹二段筆墨高逸坡石法北苑爲仲圭之佳
作第一段梅一枝甚爲簡淡不作繁花盛蕊後題至
正六年冬至日來見古泉出此卷俾畫梅華一枝以

續歲寒相對之意也梅華老戲墨第二段古松虬欹
坡石蒼潤後七言古一首款題古泉講師索畫松遂
書此塞請也梅花道人戲墨下押梅華盪朱文印第
三段新篁一枝坡石渾厚以濃墨大點爲苔後七言
古一首款題至正五年乙酉歲冬十月四日梅華道
人爲古泉師戲作野竹于橡林舊隱夢復窗下後押
一朱文梅花及嘉興吳鎮仲圭書畫記白文印第四
段蕙一叢莖葉蕭疎有致後七言古一首款梅華道
人戲墨後押棋華盪朱文印嘉興吳鎮仲圭書畫記

白文印第五段竹枝飄灑清逸後七言古一首款題
梅花道人遊戲墨池間僅五十年伎止于此古泉老
師每以紙索作墨戲勉而爲之一日出此卷屬之欲
補于後以供清玩遂作以補之古泉呼童汲幽澗泉
淪鳳髓茶延之於明碧軒焚香對坐終日晷無半點
俗塵沈人聊書此以識歲月也至正五年冬十月四
日梅華道人書下押棋華盒朱文印嘉興吳鎮仲圭
書畫記白文印後紙李肇亨一題卷多項墨林印章
及李氏鶴夢軒等印卷內前段梅花按所題年月係

墨苑集卷三
仲圭續作者

爲松巖作墨竹卷

白朱紙本高七寸五分長三尺三寸五分作墨竹四竿新篁一枝風姿飄逸筆墨蒼秀竹後一詩云竿竿有參差葉葉無限量不根而自生換却諸天眼款梅沙彌奉爲松巖和上助喜至正春三月也至正二字下空兩字庚寅朱文連珠小印後押梅華璽白文小長印一梅白文長方印二印僅見耆首卷押澹中有味白文印墨禪朱文長方印此君居白文印內多項

墨林印章及項孔彰諸印後有文信趙奕惠鑒夷簡
詩跋

江雨泊舟圖

絹本雙駢大掛幅長三尺六寸四分闊三尺三寸五
分水墨作畫得江山靜遠澹然天真之妙法董源後
沈石田多宗其法畫左首款書甚精題梅道人戲作
江雨泊舟圖兩行十字後書至正秋七月也至正二
字下空兩字押庚寅朱文連珠小印後押棗華龔朱
文印嘉興吳鎮仲圭書畫記白文印左下角鈐朱文

墨竹坡石圖
小印莫辨又仲圭有雙檜圖作古檜二株兼平遠山水布景奇逸甚爲精妙亦雙軒大幅泰定間爲雷所尊師作者與此並稱名品二圖余購之於三韓蔡氏雙檜圖未用印記爲吾仲兄壽後一好事者攝去深可惜耳

墨竹坡石圖

淡黃元紙本小掛幅長三尺有奇闊一尺水墨作一坡一石苔蘚野草紙右懸出墨竹數枝筆法蒼潤左首草書自題一云與可畫竹不見竹東坡作詩忘此

詩冰冰蠶繞繭秋雲薄戲作渭川淇澳風烟姿紛紛

蒼雪落碧籜謾謾好風來舊枝信看雷雨虛

堂字已缺

夜

拔地起作蒼虬飛款梅華道人戲作于春波客舍後
押梅華盒朱文印嘉興吳鎮仲圭書畫記白文印有
上角押懷古閣藏朱文印下角有希之朱文印圖中
此詩四友圖卷亦有此首其間改易數字

柯九思清閼閣墨竹圖

白紙本中掛幅長三尺九寸餘闊一尺七寸作墨竹
二竿用墨輕重有法雖宗文湖州又自成一家甚爲

濃古下作一石氣韻渾厚得北苑遺意圖左款書至
元後戊寅十二月十三日畱青閣閣因作此卷丹邱
生題行書得歐法下押柯氏敬仲朱文印下又二印
一印模糊一谷泉老人白文印圖右有白文倪瓚之
印經鉏齋朱文印前上下角有奎章閣鑒書博士訓
忠之家二白文印後上角有朱文敬仲畫印下角押
錫訓堂章白文印又項氏五印及希之朱文印此圖
至元之元字卞氏畫策考誤刊正字

王淵柳荷駕鵝圖

絹本雙耕大掛幅長五尺三寸五分闊三尺二寸水
墨大柳二株枝葉飄逸紫燕穿飛雙鵝戲水樹下宜
男四莖野花坡草各具生趣右作湖石於芙蓉蒲草
之間雖水墨作畫尤兼工筆較之黃徐不失高古更
加秀逸亦自成一家者款至正辛巳仲夏錢唐王若
水爲紫筠李教作于寓舍隸書于左下押朱文王氏
連珠小印虎林逸士白文印王氏墨妙朱文印末角
朱文一印

摹黃筌竹雀圖

白紙本中掛幅長四尺一寸餘闊一尺四寸八分水
墨花竹蛺蝶雙鶉瓦雀新篁解籜蒼筠勁秀其中竹
皆雙鈎以淡墨填染坡石溪水野花叢草各得其妙
畫左石閒隸書王淵若水摹黃筌竹雀圖兩行十字
下角押吳瑩之朱文印濮陽吳氏章白文印前角白
文司馬一印文難全辨

張渥臨李龍眠九歌圖吳叡書詞卷

白宋紙本凡十接高八寸五分長一丈五尺六寸白
描法龍眠筆墨蒼勁前畫屈原像卷首篆書楚屈原

像四字像後鳥絲界行篆書漁父一首後圖首篆九
歌圖三字每圖題名皆篆書圖後歌詞逐段有鳥絲
界行隸書甚精字法高古後題云至正六年歲次丙
戌冬十月淮南張渥叔厚臨李龍瞋九歌圖爲言思
齊作吳叡孟思以隸古書其詞于左下押吳叡私印
吳孟思章二白文印後款淮南張渥臨小行書五字
下押張渥叔厚白文印遊心藝圃朱文印本圖紙尾
倪雲林題云張叔厚畫法吳孟思八分俱有古人風
流今又何可得哉壬子六月廿九日觀於思齊西齋

倪瓚卷前有師古之學白文印前後押白文言世賢
思齊自省齋印詞後每段有孟思及聊消搖兮容與
朱文印

唐棣朔風飄雪圖

絹本中掛幅長四尺二寸六分闊二尺餘水墨雪景
樹石法河陽皴用捲雲枝似鴉爪葉兼潑墨上作大
嶺橫出峭壁懸流溪面一舟倉內一人危坐一人刺
篙二人扶櫓筆法高逸布景特妙右首款題至正十
一年秋九月上澣吳興唐棣子華作朔風飄雪圖下

押唐棣唐氏子華二朱文印又沈夢麟七言絕句一首後跋云荅郡唐吳江僕之親長也唐侯幼從松雪翁游其畫親受翁之指示故其筆意殊出眾史之上丙子春莫因訪子宜契家承唐侯之孫以其祖之飄雪圖求題僕因想像當時追游之盛俛仰之間歲月如此令人慨然歎息者久之華溪老人沈夢麟識下押一印模糊難辨

朱德潤秀野軒圖卷

淡牙色紙本高八寸三分長六尺一寸五分圖以花

青運墨寫溪山平遠林木清森之景中有一軒宏敞
主賓對坐後有三人徐行指顧又一漁者負罾度橋
其筆法近黃鶴山樵一派趙善長亦似之後自爲記
行書法趙文敏清勁古雅首書秀野軒記其文已見
江村銷夏錄卞氏策考文後款書至正二十四年歲
甲辰四月十日睢陽山人時年七十有一朱德潤畫
并記下押朱氏澤民肩字散人二朱文印卷有項氏
李氏鶴夢軒沈氏珍玩等印接縫有良惠堂朱文印
朱字圓印前引首周伯琦篆秀野軒三字款玉雪坡

翁書上押行中書朱文印下押周氏伯溫白文印後
紙有京口張監吳郡朱斌張吉瞿莊薛穆高啓徐賁
張羽余堯臣王行王彝徐珪虞堪周世衡徐達左金
覺董遠寄翁惠禎張均朱吉又朱吉詩跋凡二十有
二後又高平湖一跋

顧安歲寒竹石圖

白紙本條掛幅長三尺七寸二分闊一尺一寸餘水
墨晴竹二竿飄灑絕塵坡陀渾厚石具嶙嶙又以花
青運墨作二新竹更佳可謂傑思其籜竹棘草各有

清趣畫左題至正乙巳閏月八日解后仲高於橫溪
之澄玉樓作此紙以記歲寒之意款定之字法趙文
敏前首押歲寒高節朱文小長印下押松雲深處白
文印款下押顧定之印迂訥居士二白文印左下角
有鄒印式金朱文印

倪瓚秋林山色圖

白紙本中掛幅長三尺八寸七分闊一尺六寸水墨
作層巒峭壁幽磴懸泉疎樹空亭坡陀沙水各有幽
致用筆雖具關家遺意其秀潤天真蒼莽簡略又自

成家法不落畫家蹊徑者米氏之後一人若夫荒率
秀勁處惟董文敏得其奧旨相傳明季江南士夫家
以倪畫有無論清俗非虛譽也然翁畫多小幅所見
大幅惟此與絹本吳淞山色圖爲大手筆吳淞圖有
陶九成跋筆墨淋漓邱壑更勝余得之廬州太守張
見陽家未用印記卽爲有力者攝去此圖左首倪自
題詩云寓館風雨秋閒門草苔翳懷人思奮飛攜書
此畱滯玉琴和幽吟竹牖聊靜憩西山日在望白雲
澹生媚寂寞棲德園清虛損世味石竈有餘烟未收

三才圖會卷之三
三
煮茗器八月二日寫秋林山色并詩以遺伯循文學
款璫圖上藏經紙詩塘董文敏題云迂翁畫師吾家
北苑晚年一變遂有關家小景古宕之致嘗自謂合
作處非王蒙輩所能夢見此圖及山陰邱壑荆蠻喬
林古木漁莊秋霽可爲絕調矣山陰邱壑在南徐陳
從訓家喬林在余家漁莊在陳仲醇家癸卯十月夜
宿周季良清鑒閣觀因題款董其昌下押董元宰朱
白二文印太史氏白文印此幅經耿都尉家所收者
及有希之朱文一印又爲子賢作秋林山色一圖水

墨方幅不作山巒峭壁惟林木坡陀與此相彷彿上
題五言古一首自書效樂天體

江岸望山圖

白紙本條幅長三尺二寸有奇闊一尺水墨作高山
峭壁叢竹幽亭大樹三株內畫一松林麓沙渚坡陀
水口俱得其妙按雲林作畫山石多用橫皴此幅山
積礬頭兼以麻披皴直下全法巨然爲倪畫中之絕
品真變筆也畫右首自題詩云江上清風積雨晴隔
江春樹夕陽明疎松近水笙聲迴青嶂浮嵐黛色橫

秦望山頭悲往迹雲門寺裏看題名
蹇余亦欲窮奇勝舟過錢塘半日程
癸卯二月十七日賦此詩并寫江岸
望山圖奉送惟允友契之會稽款倪瓚
又莫士安丹房生白雲山人得完三人
七絕三首右下角有吳氏李氏等印

梧竹秀石圖

淡黃紙本條幅長二尺八寸四分闊一尺八分作高梧疎竹秀石平坡蒼潤淋漓之妙全以潑墨爲之倪翁竹石中之僅見者可稱神逸畫右自題云貞居道

師將往常熟山中訪王君章高士余因寫梧竹秀石
奉寄仲素孝廉并賦詩云高梧疎竹溪南宅五月溪
聲入座寒想得此時窗戶暖果園樸栗紫團團款倪
瓚按雲林書法多宗內景經此幅書宗率更畫用潑
墨皆變筆也圖右首張伯雨一詩云青桐陰下一株
石回棹來看雪未消展圖彷彿雲林影肯向燈前玩
一楚腰又題元鎮寫此紙附老僕至蒲軒卽景書圖上
款雨後押句曲外史朱文印圖中有秦國世家貞居
白文印及朱文句曲外史張天雨印

設色雨後空林圖

白紙本小掛幅長一尺八寸七分闊一尺一寸淡設色山水全以花青赭綠運墨爲之圖作重山複嶺茂樹叢林溪橋茅茨皆盡其妙又兼設色更爲罕覩世傳倪有設色蒲城春色圖余見臨本邱壑簡淡筆力纖弱知其真蹟不能勝此倪畫中布景之勝未有如此者初視以爲子久亦一奇也畫右自題詩云雨後空林生白烟山中處處有流泉因尋陸羽幽棲去獨聽鐘聲思罔然戊申三月五日雲林生寫本圖有張

墨條真觀錄卷三

手予五十年借觀宋氏不能須臾謝主人爲別此情
事歷歷在眼幾作桃源漁父可便忘否此跋不款畫
右首押長宜二字白文印下角有莫氏鄒氏黃氏等
印又見倪畫有山陰邱壑圖小掛幅絹本大設色前
下角押朱文倪元鎮印上綾隔水及藏經紙詩塘有
董文敏題識爲婁東王氏物但惜絹素稍乏氣韻耳

虞山林壑圖

白紙本條掛幅長二尺八寸餘闊一尺七分水墨作
山嶺巖壑自畫左斜出其坡陀沙脚野岸空林深得

蕭疎清曠之致右首題五律一首其詩陳蕃懸榻處
徐孺過門時甘列言游井荒涼虞仲祠看雲聊弄翰
把酒更題詩此日交歡意依依去後思辛亥十二月
十三日訪伯琬高士因寫虞山林壑井題五言以紀
來游款倪瓚圖有豈字編號四角押項墨林諸印余
曾收迂翁爲廬山甫作六君子圖乃松柏樟楠槐榆
六樹上有大癡朽木居士等題因大癡詩有居然相
對六君子之句遂名其圖世稱名蹟其筆法紙色邱
壑皆不勝此後已贈人其人售百金猶謂未得價假

如此幅又當何如甚可笑也又收翁畫徐卿二子圖
小掛幅畫竹二枝爲徐姓賀生子者遂名二子圖上
有劉青田題又優鉢曇花紙本中掛幅作平遠山水
筆墨簡淡秀潤有餘而氣韻不足董文敏二題於綾
邊甚爲稱許因迂翁詩句首有優鉢曇花不世開故
名之爲優鉢曇花此二圖今亦無存

清祕草堂圖卷

白宋紙本高八寸四分長一尺四寸三分水墨短卷
作溪山平遠茂樹遙岑叢竹茅屋坡陀沙磧皆得淡

遠之妙爲沈啓南所藏者款雲林子畫丁未八月兩
行八字前下角押沈周寶玩朱文印後下角押王濟
賞鑒過物朱文印又白文王時敏印後紙文衡山詩
題書法精妙其詩百年清祕草堂空時見烟雲斷楮
中山雨乍收江月上依然玉樹濯清風款徵明下押
白文徵明印白文悟言室印此圖余於太倉王奉常
所藏縮本冊中見石谷臨本改畫長幅見此真蹟則
知爲橫卷

竹枝圖卷

淡黃紙本高一尺長二尺二寸水墨晴竹一枝筆墨
簡淡清勁絕俗後自題云老懶無悰筆老手倦畫止
乎此倘不合意千萬勿罪懶瓚此卷前下角鈐有南
村朱文半印後下角半鈐朱文京兆連珠印松陵史
氏朱文半印後附寄陳惟寅詩帖三紙皆老年率意
之筆押有陳氏惟寅白文印卷經項墨林所藏以及
染字編號又曹秋岳一跋

王蒙青弁隱居圖

白紙本中掛幅長四尺一寸有奇闊一尺二寸五分

此圖水墨山水滿幅淋漓山頂多作礬頭皴法麻披而兼解索苔點加以破墨長點更爲新奇此乃自開生面者其閒山勢嶢嶢林木交錯一人曳杖步於山徑畫左山林深處結廬數間堂內一人倚牀抱膝而坐甚得幽致此乃隱居之所也按叔明作畫多宗董巨有時追宗右丞界畫法衛賢此圖全用巨然法其荒率峭逸而又超乎巨師之外董文敏題爲山樵第一山水非虛美也右首題至正廿六年四月黃鶴山人王叔明畫青弁隱居圖右上角押趙字朱文印下

角有魏國世家白文印左上角有趙姓白文印下角
押貞白齋白文印此圖爲明錫山華氏中甫所藏內
有珍賞朱文飄印華臺白文印及項墨林諸印上藏
經紙詩塘董文敏題云筆精墨妙王右軍澄懷觀道
宗少文王侯筆力能扛鼎五百年來無此君倪雲林
贊山樵詩也此圖神氣淋漓縱橫瀟灑實山樵第一
得意山水倪元鎮退舍宜矣庚申中秋日題於金昌
門季白文舟中董其昌上綾隔水文敏又題天下第
一王叔明畫此八字排書字大寸許款其昌又山樵

有溪山高隱圖水墨長條幅爲仲賢畫亦佳上有饒介之草書詩題卞氏畫彙考載爲叔明題詩非也

雲林小隱圖卷

白紙本高八寸長一尺九寸水墨層崖複嶺雲樹重深氣韻渾成杳無窮盡山樓一人危坐茆屋數間結林茂密中作水口奔泉溪面一人扁舟垂釣半掩山崖之後清潤絕塵布景特妙此圖深得董米三昧當與青弁圖並馳卷首篆書雲林小隱叔明爲彥輝畫三行十字下押王叔明白文印在明經王鳳洲所藏

有朱文貞元連珠印白文乾坤清賞印白文有明王
氏圖書之印後紙叔明書辭首書雲林辭三字次行
書黃鶴山中人爲雲林生賦其辭文藻奇古書法吳
興凡四百餘言後系一歌下押王叔明白文印可爲
書畫兼美者後有徐一夔蘇伯衡王裕各有辭賦記
序楷法精美又胡隆成張翥鮑恂周昉錢宰韓友直
唐志淳龍門山樵僧墳梁守正崔昊太白山人原良
鄭溫高德陽俞和方頤林靜朱誼趙鼎王廉張昱韓
諤董存方外守仁又周防凡廿四題後王鳳洲一跋

又董文敏跋云此卷余曾見臨本亦元人筆頗疑叔明亦有弱處今見此真蹟如裴旻將軍之遇真虎也董其昌題後押董其昌朱文印太史氏白文印前引首隸書雲林二大字款季潭下押僧印宗泐全室二白文印末角押張覲宸朱文一印

竹樹水石圖

錦邊白紙本小條幅四週內着綠絲界欄通幅長三尺五寸四分闊尺餘水墨蒼筠數竿枯樹二株下作坡石流泉實山樵得意之筆其樹石皴法皆類山樵

太白山卷右首自題詩云鐵網網得珊瑚枝寄與東
吳范高士翠鳳飛來毛羽寒石花青羊叱不起金鼎
夜煉天地根閉門不識桃花春吳烟拂草瀛洲綠鳥
啼花落空愁人百壺美酒恣傾倒銷盡春愁人不老
却從鶴背看塵寰四海如杯嵩華小款黃鶴山中樵
者王叔明畫并題行楷甚精前首有喬木世家白文
印後押黃鶴隱居王叔明二白文印後范立胡儼和
韻綠絲欄外上下左右有顧祿王彥文李仁王士顯
沈瑜張禮和韻更皆書法精工下又顧祿范立和韻

顧祿隸書于欄內圖中印章繁多未錄末角有吳廷
朱文印此圖因詩有鐵網網得珊瑚枝之句故俗呼
爲鐵網珊瑚圖如倪迂優鉢曇花之稱山樵又有脩
竹遠山圖長條幅書畫俱佳紙色氣韻較此稍次耳

夏日山居圖

白紙本條掛幅長三尺五寸闊一尺八分水墨山水
法巨然此圖山頂尖峭具有迴環之勢苔多破墨長
點皴用麻披解索其間重山複水陂陀平沙長松茂
密林木森深似無窮盡畫左茅茨二人對立作指顧

之狀右首題夏日山居四字款戊申二月黃鶴山人
王叔明爲同元高士畫於青村陶氏之嘉樹軒詩塘
有林瀚題七言古詩一首後款三山林瀚爲少司成
費先生題書法趙文敏前後三印內朱文二印文難
全辨末一玉堂清暇白文印此圖三遠俱備與青弁
圖同一筆法爲山樵之傑作凡余所見山樵妙蹟當
以法董巨水墨者爲上其臨摹唐人及着色之筆應
作第二觀

王冕贈雲峯上人墨梅圖

絹本中掛幅長四尺二寸闊一尺五寸七分水墨作
倒垂老梅一枝筆墨蒼潤其勢具有清標之致然萬
蕊千花過覺繁盛畫右自題詩云粲粲疎花照水開
不知春意幾時回嫩寒清曉孤山路記得短筇尋句
來款丁酉季冬山農王元章爲雪峯上人作書法古
雅下押竹齋圖書朱文印方外司馬會稽外史二白
文印又山農有紙本梅花短卷作傍出墨梅嫩條數
枝花開簡淡上題一詩云吾家洗硯池頭樹箇箇華
開澹墨痕不要人誇好顏色只流清氣滿乾坤款王

冕元章爲良佐作行楷甚佳下押王元章文王孫二
白文印前下角有方外司馬白文印末角有會稽佳
山水白文印

陳汝言百丈泉圖

白紙本中掛幅長三尺三寸七分闊一尺三寸七分
水墨山水用麻披長皴作一大山中有飛泉巒嶺迴
環林木森密其閒梵閣崔巍一僧頂包上山山村茅
舍坡石溪水一派天真筆墨高古無一不規法董巨
相傳松江王氏藏北苑谿山行旅圖有江南半幅董

元之稱太倉王氏有巨然溽暑山行圖董文敏題爲
北苑此一圖皆江南名畫余見石谷臨本思慕有年
不能一見真蹟今觀此圖山石林木筆法與石谷所
摹二圖相彷彿爲元人中超軼者當作董巨觀畫左
款至正庚子正月二日廬山陳汝言寫本圖有周南
題七律一首並跋楷法甚精張經七絕一首德祥題
質七律各一首朱逢吉五律一首下角押長宜子孫
等印

趙原晴川送客圖

白紙本小掛幅長二尺八寸闊尺餘水墨山水筆類
黃鶴山樵此圖重山瀑布水波如鱗雙松蒼虬一舟
停泊葦岸三人相別之狀寫有離情舟人僕從雖其
不工形似各真生動款葛城趙原爲退軒劉廣文畫
晴川送客圖楷書兩行下押趙善長白文一印

張中鵲鵠圖卷

白紙本高六寸二分長一尺八寸水墨作二鵲鵠一
飛一立石上水石蒼潤筆法秀逸卷末款至正庚子
張子政作下押子正朱文印前下角有景宋二字朱

文印後紙有周子治端木智吳勤高讓錢仲益李顯
越人茂詩題

釋本誠詩畫合卷

白唐紙本前紙水墨作畫高一尺三寸五分長七尺
五寸八分第一段作大小三石平坡棘草上有一題
又七絕一首下押覺隱朱文小長印道原白文印二
段作蓮房衰葦戲二鵲鵲後有枯株如石上生叢草
上又一題皆釋家語下有清事白文小長印前首押
誠字朱文圓印覺隱朱文小長印三段作疎樹茅居

橫山遠水一舟邊櫓中流畫前上題疎林平遠四字
後有二題前一題下押誠字白文小印其後五律一
首下押覺隱朱文小長印道原白文印畫後書書齋
卽事六言一首大雲特索余書故書之其詩逕遠松
篁荔鬱日長庭院清虛大貴莫過學道至樂無如讀
書下押輔成山人白文印後紙長一丈五寸八分亦
唐紙前書紙說一段後書各體詩行書草體無不精
妙後大草書吳江長橋詩有懷素高閑遺意紙尾行
書題云始于至正戊戌春丁酉良月哉生明畢事後

之覽者莫作等閒耳後押誠道原朱文小長印輔成
山人白文印覺隱朱文印後拖尾有陳繼儒李肇亨
二跋卷有李氏鶴夢軒蜨菴書畫嘉禾李氏珍藏等
印此卷較卞氏畫彙考闕余書不能精一題及生意
齋銘此二段必爲司寇截去其余書不能精一題余
後得之入于高僧冊內生意齋銘不知歸于何所也
道鄒復雷春消息圖卷

淡黃紙本高尺餘長六尺四寸八分水墨作古梅一
株花頭點綴如珠梅梢出一新條長二尺八寸有奇

一筆而就秀潤雄勁奇妙絕倫卷首押春消息朱文
長印畫後自題詩云蓬居何處索春回分付寒蟾伴
老梅半縷烟消虛室冷墨痕流影一窗來書至正庚
子新秋年月不款下押蓬華居朱文長印復雷白文
印卷後有楊鐵崖詩跋淡黃紙本長九尺八寸四分
行草書其詩字大有四五寸六七寸尺許者不等其
跋字大有三四寸者甚爲奇偉款題時至正辛丑秋
七月廿有七日老鐵貞在蓬華居試陳有墨尙恨乏
筆後押楊印維楨廉夫二白文印鐵箇道人朱文印

後又顧晏爲序紙本烏絲隔欄隸書甚佳前引首楊竹西隸書春消息三大字款山居道人下押楊氏元誠白文印山居道人朱文印卷中有黃氏任氏及關內侯滕國文獻易菴圖書等印

明

宣宗松雲荷雀圖卷

白紙本二紙一接高九寸餘長六尺二寸五分淡着色前作虬松一株湖石平坡紫芝謏草兼有碧山相映雲氣渾濛沙脚遠水各得其妙設色多以花青赭

色運墨渲暈右首正書宣德二年五月御筆賜趙王
兩行十一字上蓋皇帝尊親之寶朱文大璽後紙作
蓮房殘葉小鳥如生湖石水草俱得真趣上書御筆
二字蓋安喜宮寶朱文方璽此卷筆墨高逸秀潤天
成考厯代帝王畱心畫道者宋道君明宣宗皆精繪
事一治一亂何其霄壤乃爾要知在於務本畫道豈
妨治道哉

王紱齋宿聽琴圖

白紙本中掛幅長三尺七寸九分開一尺四寸八分

中心四週烏絲界一方欄徑九寸內水墨寫虛堂烟
月翦燭鳴琴共樂昇平之景其松竹坡石筆墨蒼潤
秀逸爲孟端佳作左下角押王氏孟端白文印烏絲
欄外右下角自題五言長詩一首款無錫王孟端下
押九龍山中道士孟端二白文印紙首上一段畫烏
絲界行鄒緝撰序楷書精工前書翰林院齋宿聽琴
詩序其序云永樂三年春正月丁未上將祀南郊誓
戒羣臣致齋三日百官旣受誓各就宿別館於是侍
讀曾公日章修撰錢公仲益徐公孟照檢討蘇公伯

厚沈公民則暨無錫王公孟端與予凡七人皆會宿于翰林之公署于時天宇澄霽月色清朗諸君子相與秉燭坐于公署之東偏或弈棋或賦詩或談說古今辨論人品賢否得失亦襍然而並舉然皆以爲此雖君子之所樂而未足以極一時之歡也沈公故爲雲閒人善鼓琴其傳得之於其郡人劉仲禮前數年閒仲禮以善琴聞當時沈公蓋傳得其妙因請鼓之沈公欣然就坐爲作商調數引舒徐安適疏越和暢其音古澹泊若有三代之遺音其清厲激烈之思若

孤鶴宵唳高崖瀉泉而餘音鏘然震發也坐者聽之
莫不爲之心暢神怡有不知夫邪慢之氣之去其體
者然後知琴之爲妙不特可以爲君子之至樂而又
足以蕩滌人之私慮也此古之君子所以無故琴瑟
不去於前歟昔三代學者於詩書六藝之教以樂爲
治心養性成德之本未嘗一日舍之而不習故其息
焉游焉之際必取適于琴瑟之間所以和悅其心志
動盪其精神且以是爲文武弛張之道則琴之爲用
固非苟悅其音聲之謂也今諸君子獲爲斯會而樂

其心於是琴豈非幸之至者歟夫君子會而能樂者
既難樂而得其所以樂者又難琴雖予有未暇學而
心竊好之況又爲諸君子之所同欲者乎乃相與分
韻賦詩以紀述其事且要孟端爲之圖而予僭序其
端云翰林侍講承直郎廬陵鄒緝撰下押范陽世家
鄒緝仲熙印二印皆白文前首有尙友齋白文小長
印下有幼寰白文小方印鄒序一又燕山曾日章番
陽徐旭錫山錢仲益三人排書各五言長詩一首曾
錢二人皆端楷徐旭篆書俱佳

書

鄒緝又楷書題五

言長詩一首款廬陵鄒緝書左烏絲欄蘇伯厚楷書題
五言長詩一首款建安蘇伯厚下曾槩題七言長詩
一首楷書類宋克款江西曾槩又廬陵周孟簡沈度
五言長詩各一首周書行楷沈書隸古諸題皆有印
章因其繁多未及全錄又孟端有岱嶽春雲一圖水
墨長條幅筆法類叔明上有自書長題楷法精妙余
最心賞者爲一友人索去至今猶在夢想

秀石晴竹圖

白紙本中掛幅長三尺五寸六分闊一尺四寸八分

水墨寫晴竹二竿秀石平坡下作新篁一叢風姿飄
灑枝節清勁畫左款九龍山人爲奇石寫下押孟端
白文印上有錫麓王達吳興莫士安各七言絕句一
首孟端款下又松泉隱者七言絕句一首三題皆有
印記繁多未錄

劉珏清白軒圖

白紙本條幅長二尺八寸五分闊尺餘水墨山水作

溪山圖

唐寅桐山圖卷

白紙本高九寸一分長四尺有奇淡着色作橫山平
遠闊水長沙遙峯映帶秀色浸人後作峭壁懸流壁
出三桐一桐離披筆墨高妙布景疎曠爲六如得意
之作後自題詩云吾聞淮水出桐山古來賢哲產其
閒君今自稱亦私淑漁釣須當備一灣款書吳門唐
寅作桐山圖下押唐伯虎朱文印南京解元長條朱
文印前首有吳趨朱文圓印後紙有文徵明袁袞蔡
羽王寵徐伯虬文彭文嘉陸芝袁褰陸師道顧問黃

姬水王延陵王穉登各詩王鏊題清樾唵窩四大字
於藍箋上書法蒼勁清古後款拙叟二字中押濟之
朱文長方印前押顏樂齋朱文長印下押白文大學
士圖書印

松坡高士圖卷

白紙本高九寸餘長二尺五寸四分水墨懸崖瀑布
遠水長坡怪石松藤皆具高古一人幅巾垂袖氣宇
高逸於坡閒獨步筆墨位置之妙蒼秀精奇嘗見六
如所作每做李唐此卷兼有荆關遺意可謂神品後

楷書款題松坡圖唐寅製六字下押唐伯虎朱文印
末角有程正揆白文印前月白絹隔水徐朗白標題
唐六如先生松坡高士圖真蹟效荆關體絕世神品
前後隔水有朗白詩跋後紙有王百穀董文敏跋又
程正揆二跋此圖書畫舫曾經記載云子畏水墨松
坡圖全學李晞古所畫四松奇古之極王徵君百谷
故物也

琢雲圖卷

白紙本高七寸長三尺七寸有奇水墨樹石長坡蕭

疎簡遠中有一僧袖手而立餘皆一片雲海其勾染之妙又超然於畫家蹊徑之外末角惟用一江南第一風流才子朱文印亦所罕見者後紙張青甫一跋云此六如居士琢雲圖也畫品當屬第一琢雲本吳人出家白蓮涇之慧慶寺其戒律甚精嘗刺血寫蓮經道行不可殫述但禪誦之暇頗好法書名畫不啻支公之愛馬也傳聞琢雲初欲得六如居士作圖而難發諸口乃請東邨周臣代作第懇居士署名居士默喻其旨欣然從之并爲別作圖卷如右圖後更不

署名僅用江南第一風流才子印記而已二卷並存
寺中其嗣祕不示人卽有好事者堅請而後出之亦
不過東邨之筆居士所署名者也得見居士真蹟者
或寡矣庚戌春仲有嗣孫悟中者從山齋見余所藏
六如居士讀騷居畫卷不覺踴躍歎賞曰善哉善哉
吾祖琢雲畫卷之妙亦有並轡齊驅者乎及余詢之
以他語對久之往來契密撤去城府始克出示六如
真蹟凡圖中風雲樹石筆墨氣韻絕類余家藏本而
蕭疎過之誠可珍也因爲題其後曰六如琢雲畫卷

駸駸上逼元鎮龍門僧豈止媲美吾家讀騷居圖而
已耶悟中可謂鑒古得畫趣矣玩閒聊題數語以志
曾覽長洲張丑青父識下押白文張丑之印前押山
齋朱文圓印引首有琢雲二大字款青山居士書

高泉古樹圖

白紙本小條幅長三尺五寸八分闊九寸水墨山水
作高山危閣陡磳懸泉下有茅茨一人獨坐一童度
橋筆墨位置渾厚瀟古兼有逸趣左首自題詩云高
泉落礪玉淙淙古樹蟠旋似臥龍人爲利名閒不得

吾能此地着吾踪款唐寅下押南京解元唐居士朱
文二方印上洒金淡黃箋詩塘董文敏題唐子畏每
倣李唐此倣關同特爲高古其昌觀因題下押董印
其昌白文印

女兒嬌圖

白紙本長方幅長一尺六寸餘闊一尺一寸作水墨
牡丹一枝全以墨之濃淡分其紅白二色花頭枝葉
秀色逼人宜爲小品中最精者右首自題云昨於劉
都憲見女兒嬌乃蜀中牡丹奇本也正白樓子中泛

大紅數葉達夫索牡丹因爲貌之款唐寅下押唐伯虎朱文印此題書法甚精雖法李北海其蒼秀之氣又非拘拘形摹者此幅以花名女兒嬌故名之於圖孟蜀宮妓圖

絹本中掛幅長三尺七寸闊一尺八寸八分絹素精潔氣色鮮美設色人物大一尺八寸有奇筆法娟秀人面傅粉用三白法作宮妓四人頂戴碧冠者二執壺者一捧盤箸食物者一皆素粧淡抹各含妍媚右上首自題詩云蓮花冠子道人衣日侍君王宴紫微

花柳不知人已去年年鬪綠與爭緋後自題云蜀後
主每於宮中裏小巾命宮妓衣道衣冠蓮花冠日尋
花柳以侍酣宴蜀之謠已溢耳矣而主之不挹注之
竟至濫觴俾後想搖頭之令不無扼腕款唐寅寅字
上蓋唐伯虎朱文印下押南京解元朱文條印畫左
下有二印模糊此圖書畫俱佳可稱精品

山靜日長圖冊

絹本圖玉露中山靜日長一則爲十二幅王伯安按
圖書文分爲十二段圖中所作凡溪山樹木水閣幽

居茅屋書舍松竹蕉桐人物器具無不臻妙更且布
景精微筆墨工緻雖法南宋人筆而清潤之氣又超
越遠矣爲六如生平傑作圖首幅有南京解元朱文
小長印每幅或押白文唐寅私印唐子畏圖書朱文
印或唐子畏朱文印唐伯虎朱文印末幅蠅頭小楷
一行書吳郡唐寅圖于劍光閣筆法間架深得李北
海遺意下押唐子畏朱文印白文唐寅私印凡對頁
王伯安行書大寸許筆法蒼勁每段押伯安朱文印
陽明山人白文印末幅款書正德己卯冬日陽明山

人王守仁書後押伯安陽明山人二印後絹華補菴
跋云中秋涼霽偶邀唐子畏先生過劍光閣玩月詩
酒盤桓將浹旬案上適有玉露山靜日長一則因請
子畏約略其景爲十二幅寄興點染三閱月始畢而
王伯安先生來訪山莊一見嘆賞乃復慙慙伯安爲
書其文竟豪慨許卽歸舟中書寄作竟日喜急裝潢
成帙時出把玩夫子畏得輞川之奧妙而伯安行書
磊砢有奇氣況二公人品才地皆天下士也一旦得
成合璧豈非子孫世世什襲之寶耶是歲嘉平月十

日補菴居士識此跋小楷甚佳法鍾太傅季直表下
押補菴居士白文印冊中有劍光閣朱文小長印補
菴居士白印朱文錫山華氏補菴家藏印朱文顯之
圓印以及北平孫氏朱文印冊經孫退谷少宰所藏
文徵明袁安臥雪圖卷

白紙本高八寸長二尺三寸圖寫雲氣凝空冰花積
地一片瑩潔之景淡着色作陂陀古樹木柵柴扉茅
茨一人擁被僵臥門外一人手持短杖踏雪指顧後
有具古衣冠者二人停車履素作欲啓扉之狀畫中

長松七株蒼秀挺拔更覺清古此圖爲衡山精品末
下角押文印徵明悟言室印二白文印前有殆字編
號後紙烏絲界行自書袁安本傳小楷甚佳自又跋
云嘉靖辛卯冬月雪後袁君與之過余停雲館因憶
勝國時趙文敏公爲袁靜春作汝南高士圖遂仿像
爲之明年從松江朱氏借觀松雪舊圖筆力簡遠意
匠高雅真得古人能事始覺區區塵冗可媿也而袁
君不以爲劣裝池成軸攜來相示遂抄袁公本傳系
之而老目昏眊書不成字蓋欲拚其醜而卒不能拚

也是歲壬辰冬十一月十日徵明識下押徵明朱文
連珠小印前下角有文印徵明白文印徵仲朱文印
卷多項氏印爲天籟閣所藏者

眞賞齋圖卷

白紙本高八寸四分長二尺三寸淺着色前作湖石
假山植松檜紫薇於其間後作草堂書室堂中一人
據案而坐雙手展卷一人對坐似相語者傍設一案
上陳古鼎尊彝一童侍立於右繞屋脩竹蒼松高梧
古檜甚得幽致爲衡山用意之筆文畫中不能多數

也松前細楷三行書嘉靖丁巳徵明爲中甫華君寫
眞賞齋圖時年八十有八前下角有白文徵仲父印
廣字編號後下角押白文悟言室印後紙烏絲界隔
自書眞賞齋銘并序小楷蒼勁款嘉靖三十六年歲
在丁巳四月旣望長洲文徵明著并書時年八十有
八下押朱文徵明連珠小印白文徵仲父印卷經項
子京所收有項氏諸印後有高詹事一跋世傳文衡
山爲華氏作眞賞齋圖有二此其一也一爲商邱宋
氏所藏後有豐道生爲賦者

江山初霽圖卷

白紙本高六寸九分長四尺餘水墨山水微加花青
渲暈非公本色之作法北宋人筆兼有荆關遺意氣
韻深厚布景特勝其閒山重水複萬壑千巖村舍梵
宇舟檣漁樵甚得精緻末後江天闊處山勢陡然而
止不作坡陀沙脚出人意外後上首細楷四行題歲
丙寅春雨霖淫意殊憤憤三月望後稍霽弄筆窗閒
作江山初霽圖適友生陳清道復至因以贈之卷前
下角有停雲朱文圓印後有衡山徵明二朱文印此

卷爲文太史得意之作生平僅見者卷後雖無題識
不失爲精品前引首篆江山初霽四大字無款乃太
史自題前下角有顧氏家藏朱文印圖後附公之門
人張本爲太史九表八十韻楷書蒼秀紙本畫烏絲
界隔前書奉壽太史衡山先生九表八十韻詩後款
題嘉靖己未春正月十八日門生洞庭張本敬賦前
有忠定公之後一朱文印後押斯植連珠印震澤張
氏印雲山玩易樓印三印皆朱文此圖按書畫舫云
文太史江山初霽圖紙本淺絳袖卷全倣荆關行筆

極細而有韻度山林深遠恍遊異境按左方小楷跋語乃是寫贈陳道復者真神品也此本今在崑山顧氏

畫冊

白紙本水墨作山水松竹石蘭二十四幅作山水水六內做米二雨景雪景各一又松竹四甚精竹石十內做柯九思梅道人者更佳又春蘭四末幅上題一詩云離離蒼水珮居然在空谷雖多荆棘枝春風自芬馥款徵明下押徵明印悟言室印二印皆白文此

後有黃姬水王世貞二題

仇英玉洞仙源圖

絹本中掛幅長五尺餘闊一尺九寸二分筆法趙松
雪作青綠雲山松藤盤鬱萱花芝草映帶左右松下
一人前列琴書鋪茵趺坐靜對玉洞潺湲儼然仙境
童子有四烹泉洗茗者三二童子捧桃實由板橋而
度按容臺別集董文敏稱十洲爲近代高手第一兼
有南宋二趙之雅觀此圖山石樹木設色之蒼潤雲
氣勾染之流離殿宇界畫之古雅人物點睛之神妙

無不盡善可謂妙手靈心非拘拘泥於形似工緻者
比誠爲名下無虛畫右隸書款仇英實父製下押仇
氏實父朱文印

桃源仙境圖

絹本中掛幅長五尺一寸闊一尺九寸二分青綠大
設色筆仿趙千里圖作滿幅雲山林木森密中一奇
松欹斜虬曲古藤盤繞山洞道者三人臨流而坐一
鼓琴者一童手提都籃侍立於左一童捧卷度橋橋
下溪水奔流坡多紅桃掩映半山一人負囊繞欄而

上又於松林深隙作行脚二僧行轉山坳其閒雲烟
縹緲梵宇層疊懸崖一亭宏敞甚爲險峻上段杉樹
重溪水閣一人倚檻遠眺因此又名之爲三教圖其
布景用意之妙與玉洞仙源相彷彿可稱雙美畫右
石上款書仇英實父爲懷雲先生製小行楷甚精下
押仇氏實父朱文印下角有陳氏惠相白文印左有
懷雲朱文印下又朱文二印模糊難辨下角有一腰
圓朱文半印

秋江待渡圖

絹本雙駟大掛幅長四尺五寸有奇闊三尺八寸五分淡着色畫臨劉松年而秀潤過之圖寫層山烟靄長林遠村江水平闊秋光如在畫左斜出一山坡如鴨嘴林木交錯路徑縈曲灘邊泊一客艘輕浮水面窗檻梢蓬皆多雅致觀之覺動昔年江上之思下作長松紅樹衰草坡石唐裝一人素衣烏帽欹身坐石待渡一童負書卷雨傘於後一夫息肩傍立一從者勒騎林下對岸村舍數間竹樹蕭疎下有一舟一人持篙手招岸上一童趨赴其神情之妙各具生動此

幀爲十洲之大手筆每見十洲所作凡臨摹前人者皆不書款此爲項墨林摹古之作雖無款識畫右下角有仇氏實父朱文印白文仇英之印左下角有十洲朱文葫蘆印上下有項氏諸印

竹院逢僧圖

絹本小條幅長二尺一寸八分闊九寸四分青綠着色筆仿趙松雪圖作高峯峭壁瀑水懸流一松挺秀萬玉幽深竹杪一亭微露數間屋宇松下儒釋二人對談一童負書卷傍立一童捧盤步山磴而下畫左

下角隸書仇英二字下押仇氏實父朱文印此幘布
景高逸筆法精妙上絹詩塘文三橋一跋云竹院逢
僧詩家妙處方其啜茶清話酬酢應對不可得而見
也實父此圖長松落陰修竹挺翠而蕭閒清遠之趣
有出於筆墨蹊逕之外非真知此詩之妙者不足以
取容至此也嘗聞趙文敏有此圖而未及見意實父
亦自其中來耶款文彭題此跋草法精奧大類孫虔
禮書譜下押文彭朱文印文壽承氏白文印又一法
趙千里絹本小條幅重青綠設色亦作高峯瀑布修

竹孤亭唐裝一人朱衣烏帽同僧坐石上一童竹閒
侍立左有石案上列茶具一童煮茗岸立一鶴山頭
以長點爲苔及樹石坡草秀潤已極更且設色鮮麗
布景精工與前圖可爲雙玉左下角小字款篆癸卯
仇英四字下有寶父白文小長印

滄浪漁笛圖

絹本中掛幅長四尺四寸六分闊二尺淺着色筆法
李唐畫右高山陡立松徑縈曲下作草舍茆堂碧梧
嫋柳其間野竹紅薇萱花細草殊多思致堂內一人

一畫卷
三
謁肩袒腹據牀而坐描寫午睡初足之意庭前一童
烹茶橋邊一童引繩取水畫左遠山橫出水面當溜
一舟漁者弄笛而來觀之宛如真境右首山石之上
款書仇英實父爲懷梅丈堇製兩行十字小行楷甚
精下押十洲仙史白文小印仇氏實父朱文印左下
角有凝香閣朱文條印此圖布景精工筆墨高妙其
秀潤之氣又非晞古所能及也

空洞觀音像

絹本長掛幅長四尺九寸三分闊一尺九寸三分水

墨山石法李唐佛像神鬼設色法唐人圖寫山洞大
士一尊素衣慈貌凝神趺坐前設琉璃一器內安淨
瓶注一柳枝對而現一金龍甚爲純馴山下四魔立
於波浪中作撼山之狀善才於水面乘蓮瓣合掌而
朝韋馱步雲捧魔杵而至鸚鵡飛翔其間筆墨設色
之妙可謂無上精品至於雲氣海水更爲奇絕歷宋
元明以來未有出其右者款書大乘弟子仇英實父
薰沐拜畫蠅頭細楷書於畫右山石之上後押仇英
朱文連珠小印十洲仙史白文印經耿氏所藏者

臨宋人山水界畫人物畫冊

冊計十幅皆絹本內仿趙千里二團幅作青綠雲山
江閣飛帆前一幅藏經紙對頁董文敏題趙千里多
學李將軍海岸圖惟實父摸擬適肖元宰爲祖洲弟
下押太史氏董印其昌二白文印第二幅藏經紙對
頁董文敏此趙千里駒蜀江圖也實父臨之所謂冰
寒於水元宰爲祖洲老弟下押太史氏董印其昌二
白文印又仿夏圭四方幅二作江閣觀潮圖二作溪
山村野圖又仿馬遠二方幅作御院荷香圖又仿松

年劉二橫方幅作村學圖皆精後藏經紙董文敏題
仇實甫於臨宋畫無所不似尤工趙伯駒而自靳不
時爲之獨以劉松年馬遠夏圭酬應然皆過之雖未
人所所難也此冊得其大全矣季白寶之壬戌仲春
其昌識米萬鍾同觀後押董其昌印白文印冊有項
墨林及項祖洲等印

臨宋人花果翎毛畫冊

冊計十二幅皆團絹本第一梨花繡羽二棠花黃鸝

三白碧文禽

四

楊梅山鳥

五

蝶雀榴花

六

八仙么鳳

七藕花翠雀

八九

皆小鳥荔枝

十

水莊翠羽

十一

蠟

嘴山查

十二

梅雪鵲鵲每幅有十洲印章及項墨林

諸印可謂精品

王穀祥水仙花圖

白紙本小條幅長三尺七寸三分闊一尺作白描水仙數莖法舜齋下面左右大坡斜出用墨渲染中有水口坡間墨草數筆飄冶之至苔點蒼潤秀逸絕俗上書水仙花賦小行書十八行筆法古雅前書水仙花賦徐天全撰後款王穀祥書下押穀祥祿之朱文

印

文伯仁江山蕭寺圖

白紙本小掛幅長二尺八寸四分闊一尺一寸餘作
淡着色山水其輪廓皴法落墨清勁峭拔着色樹用
花青山石多以赭色渲染簡淡高雅不失家範圖寫
秋山映秀江天一色之景上段沙渚遙岑一望無際
江中突出一磯作立陡懸崖雙峯孤寺其客舟江艘
有泊山脚者有行江面者筆墨位置之妙絕無塵埃
之氣誠爲五峯第一佳作右首篆江山蕭寺四字款

五峯山人文伯仁寫下押五峯文伯仁朱文二小印
惜其耿氏大印過繁爲圖中之疵耳

秋山遊覽圖卷

白紙本高八寸二分長八尺二寸着色山水筆法叔
明圖作溪山村舍梵宇幽居衰柳風帆白雲紅樹中
有攜琴度橋者亭下觀瀑者曳杖步遊者乘騎指顧
者筆法文秀而兼工緻甚爲精妙卷末款書一行嘉
靖丙寅七月五峯文伯仁寫下押五峯文伯仁二朱
文印卷前有虛舟子鑒賞白文印清蘿居士收藏朱

文印後有雲程白文印後紙有莫是龍葉崑二跋

陸治爲五湖畫卷

白紙本高八寸七分長二尺七寸九分此圖陂陀林木皆以赭色淡綠爲之中作平湖村樹舟艇長橋一派曠遠之趣筆法秀逸爲叔平用意之作前款嘉靖戊午三月陸治爲五湖先生作下押包山子陸氏叔平二白文印後附文衡山次韻遊石湖二詞王雅宜石湖七絕八首皆與陸子傳者又彭隆池和臨汎石湖七律四首周公瑕和臨汎石湖七律二首皆與元

洲者

松壑閒居圖

白紙本小掛幅長二尺七寸八分開一尺一寸六分
淡着色筆法王叔明此圖遠峯迷濛山勢奇崛瀑水
層流松壑深寂一人危樓靜眺一人杖履度橋筆墨
位置甚有幽致畫首楷書自題云黃鶴山人畫意從
摩詰谿徑中來最爲古雅余少時每喜效之晚年思
慮頗多雖筆墨蒼老似或過之而無間士雅之氣反
不如前丁巳初夏獨處中因想山人松閒壑居之氣

作瀑爲鑒賞者求之驪黃之外必無所取也包山陸
治識後押陸氏叔平白文印前下角又押陸氏叔平
白文印余凡見叔平山水紙上所作間有佳者至於
絹本鮮有精品余收一方無花溪高隱圖乃絹本上
有楷書自題七言一絕其畫甚佳又見耿氏所藏花
溪漁隱圖又一種菊圖上題七言一絕爲陶君者俱
紙本長條幅亦精又一梅石水仙雙鳩圖水墨紙本
精妙絕倫爲余所收得天張司寇見而愛之遂以爲
贈

項聖謨松濤散仙圖卷

白紙本高八寸四分長二丈三尺七寸四分水墨山水兼白描布景位置宗摩詰輞川圖盧鴻草堂圖法其生動精細過之孔彰作此圖名松濤散仙者其意自命爲散仙也其閒山巒嶺岫萬壑千林深谷層巖村居田舍無不精到萬松之中寫有幽居旁繞溪澗松藤下一人臨流抱膝而坐一人席地對談開卷石壁閒小楷書題松濤散仙圖五字下有朱文聖謨連珠小印後蠅頭細楷款書崇禎改元戊辰七月援筆

至明年二月始成是日辛卯識于疑雨齋項聖謨下
押孔彰父蓮塘居士白文二小印圖後楷書自題五
律八首又自跋云余髫年便喜弄柔翰先君子責以
制舉之業日無暇刻夜必篝燈着意摹寫昆蟲草木
翎毛花竹無物不備必至肖形乃止忽一夕夢筆立
如柱直干雲漢上有層級如梯長可一二丈許余登
而據其臺端鼓掌談笑嗣後師法古人往往自得每
欲別置草堂於山水之間以寄我神情恨未能得一
勝處迄今二十餘年孳孳筆墨未嘗離之自丙寅六

月畫成招隱圖後此第二卷也命曰松濤散仙圖蓋
爲余山齋壘石作坡多種古松綴以花竹嘗夏日箕
踞其下以追涼風偶有自詠詩曰偃息松濤一散仙
葛巾掛壁自閒眠窗前有竹聊醫俗不到長安已十
年適戊辰歲經齊魯出長城歷燕山遊嬀川又入長
安凡九閱月邸中無事唯揜屏作此圖將半卷一日
出旣倦乘馬歸而馬疾如飛鳥忽爾墜地傷右肱不
能展舒夫馬非不良也御亦非不善也意者其天乎
見之者莫不爲項子太息曰君爲造物忌又有次相

慰示者曰此腕中當有神護無恙也余亦自忖爾爾
日飲酒數升盡醉狂叫果爲造物忌耶抑欲窮項子
耶對月則長嘯浩歌聽雨則臥遊天表旬日稍有起
色乃出平昔所自玩書畫遍覽一番此卷在內見之
更自嗟悼不已未幾臂果無恙遂欣然命童僕治裝
南還迨明年之正月穀日抵家見山齋松色蒼秀森
蔚率爾神動急出此卷以續其半豈真腕中有鬼耶
項子其真散仙耶不然豈古人筆墨精華欲一發洩
倩余手作合聚會一時而惠及我臂耶展卷閒不覺

躍然題此不自知其妄也并前五言八韻書之崇禎
二年歲在己巳清和月識于朗雲堂秀州孔彰項聖
謨下押朱文項聖謨印孔彰白文印高梧修竹人家
白文印卷前後押有松濤散仙白文印子毗清玩朱
文印以及樂琴書以消憂項子毗祕賞項聖謨詩畫
清河草堂等印前引首紙題有松濤散仙圖五字前
押清和堂白文長印圖後接縫處書有一押並鈐印
記於其上觀容臺別集董文敏稱孔彰學畫士氣作
家俱備非虛譽也

董其昌關山雪霽圖卷

白鏡面箋本高四寸長四尺一寸五分小袖卷筆法清勁雖法關仝其荒率秀逸而又超越於蹊徑之外後首題小楷六行云關仝關山雪霽圖在余家一紀餘未嘗展觀今日案頭偶有此小側理以圖中諸景改爲小卷永日無俗子面目遂成之乙亥夏五元宰末押半鈐白文董印紙後華亭顧大申鷹阿山樵戴本雲間沈荃雉皋巢民老人四題

秋山圖

絹本中掛幅長三尺六寸八分闊一尺六寸青綠山水倣趙千里筆意兼用唐人法圖作陡壑懸崖坡陀闊小一亭幽寂雙松高挺中有楓樹一株葉色鮮紫異常深得夕陽映發之妙秀潤已極誠非前人所能及也上自題詩云遠近孤山千萬重醉來吾欲採芙蓉峯頭何處歌招隱如此丹邱不易逢後題倣趙千里筆意乙卯夏日畫於元賞齋庚午中秋重觀因題元宰後下角有家孫庭藏四字前下角有儼齋祕玩朱文印經松江王司農所藏者

婉變草堂圖

白鏡面箋本中掛幅長三尺二寸六分闊二尺餘水
墨山水用墨深沈樹石奇異渾厚天成秀色欲滴其
山巖雲氣林木茅居無不精妙乃文敏之變筆圖爲
陳眉公者上凡三題第一題婉變草堂圖五字後書
丁酉十月余自江右還訪仲醇於崑山讀書臺寫此
爲別董其昌第二題是歲長至日仲醇攜過意欲設
色適得李營邱青綠烟巒蕭寺圖及郭河陽谿山秋
霽卷互相咄咄歎賞永日其昌記第三題以觀李郭

畫不復暇設色米元章云對唐文皇蹟令人氣奪良然元宰又記後下角有儼齋祕玩朱文印

倣雲林山水圖

白紙本中掛幅長四尺九寸二分闊一尺四寸六分水墨山水法倪迂兼有關全遺意上段正中一山層疊畫左一山斜出下面疎樹幽亭一松挺拔其陂陀沙水具有曠遠之致畫右首自題云雲林山陰邱壑圖在京口陳從訓家余嘗借觀不獲臨寫粉本第雲林自謂得筆於關全余家有關全雪霽圖足爲雲林

粉本耳款元宰畫乙丑上元日下押董印其昌白文
印後陳眉公題云雲林畫江東之家以有無爲清俗
今董宗伯畫亦然余家藏范寬釣雪圖發脈關李元
宰與倪老同參非專摹迂筆也眉公鑒定下押眉公
二字朱文印此圖經耿氏所藏者

山居圖

白紙本小掛幅長二尺五寸六分闊一尺一寸餘水
墨山水倣大痴兼用米法中作重山絕壑梵閣層崖
溪橋茅居陂陀沙水其筆墨之妙蒼逸簡遠秀潤天

眞誠爲精品畫上小行楷題一詩云雖有柴門長不
關片雪高木共身閑猶嫌住久人知處見欲移居更
上山後書蔣道樞見訪留西樓十餘日爲索余山居
圖以此贈之乙卯秋立後三日也董元宰下押董印
其昌朱文印又陳眉公和韻一詩云我有荆扉懶上
關長呼病鶴鬪清閒若容蔣詡來參我不是深山也
是山又自題云蔣道樞訪元宰後又入白石山訪眉
道人道人依韻贈之陳繼儒題後押眉公朱文印繼
儒白文印上洒金白箋詩塘文敏行草書又自題詩

云積鐵千尋屈紫虛雲端雞犬見村墟秋光何處堪
消日流澗聲中把道書又自題乙卯畫山居圖以唐
詩題之癸亥重展題以拙句夏五望後三日其昌下
押董印其昌白朱二文印

倣楊昇沒骨山水圖

絹本小條幅長二尺七寸餘闊尺許重設色沒骨山
水中作高山平麓叢樹幽亭紅綠萬狀宛得夕照之
妙上行草書題唐子云紅樹秋山飛亂雲又小行書
款倣楊昇沒骨圖董元宰下押太史氏白文印董其

昌朱文印首押畫禪二字朱文印相傳設色沒骨山水昔始於梁張僧繇然考歷朝鑒藏及圖繪寶鑒未嘗有僧繇山水之語卽楊昇之作亦未見聞自唐宋元以來雖有此法偶遇一圖其中不過稍用其意必多閒工筆未見全以重色皴染渲暈者此法誠謂妙絕千古若非文敏拈出必至淹滅無傳今得以古反新思翁之力也斯法之作余凡見五本皆佳當以此幅更爲甲觀

山水高冊

白紙本計十幅每幅高一尺六寸餘闊尺許內水墨者七著色者三

第一

臨龍眠雲錦淙水墨山水右首

小行書題盧鴻草堂圖李龍眠臨本今在京口張秋

羽家余數得寓目因倣雲錦淙一幅于此款元宰圖

左首行書題雲錦淙三字

第二

法燕文貴水墨山水

左首小行書題云此亦擬燕文貴筆也與元人氣韻

相近倪元鎮似窺其一斑王叔明遠矣元宰

第三

法

叔明淡着色山水左下角小行楷題癸亥四月倣黃

鶴山樵筆元宰

第四

倣倪迂水墨山水左首題雲林

六言一詩字亦法倪其詩江渚暮潮初落風林霜葉
渾稀倚杖柴門閒寂懷人山色依微瓊後題元宰倣
雲林筆癸亥七月廿二日識

第五

法李成水墨山水

右首小行書題偏頭關萬金吾邦孚家藏李營邱平
遠小絹幅與成國家巨軸同一筆法米元章云真李
成見二本此殆近之因倣爲小景唯水墨渲運處非
郭熙許道甯所能及耳甲子七月廿九日元宰左首
行楷書題巖居高士圖五字

第六

淡青綠山水右首

小行書題云霽雨帶殘虹映斜陽一抹紅樓頭畫角

收三弄東林晚鍾南天曉鴻黃昏新月弦初控望長
空披襟誰共萬里楚臺風後書楊用修雨中遣懷曲
元宰書以題畫不必與畫有合

第七

水墨山水上行

楷書一詩云聞道移居村塢閒竹林多處獨開關故
來不爲緣他事暫上南亭望遠山後書甲子八月十
三日元宰右首楷書題香山詩意四字

第八

青綠山

水右首行楷書石壁過雲開錦繡疎松隔水奏笙簧
後書辛酉九月惠山道中寫所見因補圖命之曰杜
陵詩意元宰

第九

水墨山水右首小行楷題趙大年

每作佳山水卷人輒謂是上陵回耶宋時宗室有遠
游之禁故也余此圖在上陵回日因識之後書用子
重九後三日元宰第十水墨山水右首小行書題吾
家有趙集賢水村圖及文太史臨本皆從輞川得筆
二卷久已失之彷彿爲此用子九月晦記元宰諦觀
此冊爲文敏無上妙品其間水墨者清潤高古簡淡
蒼逸設色者秀色若涇渾厚奇異邱壑位置皆出意
表余所僅見者相傳太常王奉常收有思翁一冊畫
計三十餘幅內有南陵水面詩意一圖上畫紅衣女

子如粒米倚樓窗而立甚奇內又做楊昇沒骨山水一幅亦精後爲王相國攜至都門相國沒其孫挽人求售時余有捐工之役未得一見至今猶在夢寐

山水方冊

白鏡面箋本計六幅每幅方七寸許水墨山水

第一

畫右行書款元宰下押董印其昌白朱二文印

第二

畫右首行草書款思翁筆下押宗伯學士白文印

第三

三畫左首行書款元宰下押董印其昌白朱二文印

第四

畫左首行書做山樵款思翁下押董氏元宰白

文印

第五

畫左小行書題辛未中秋寫款思翁下押

宗伯學士白文印

第六

畫左首行書題倣梅花道人

筆壬申六月朔付第七孫麋收藏蓋董印其昌白朱
二文印此冊紙色如玉筆墨超逸付其孫者故是佳
品外籤乃得天張文敏爲余所題

書畫小冊

白鏡面箋本畫六幅對頁黃紙本六幅每幅草書題

句

第一

水墨山水左首小行草書元宰倣黃鶴山樵

第二

水墨山水左首小行楷書癸亥十月望元宰

第

三 水墨山水上小草書元宰寶華山莊畫 第四 水墨

山水左首小行楷書元宰畫太白詞 第五 淡着色山

水畫左小行書款元宰 第六 水墨山水上小行書題

癸亥十月山莊紀興共得六景元宰識後頁有沈文
恪高江村題及江村題籤此冊書畫俱佳若不經意
荒率處更有妙趣可爲珍玩

書畫雙璧小冊

白鏡面箋本書畫十六幅對頁每幅草書題以五言
舊句畫皆水墨山水 第一 法董米右首小行書款元

宰第二倣叔明上小行書題元宰倣黃鶴山樵第三

法董巨右首小行書款元宰第四倣雲林右首小行

書款元宰第五倣米右首小行書款元宰第六法荆

關左首小行書款元宰第七倣仲圭左首小行書款

元宰第八法北苑左首小行書題元宰庚申夏日寫

此八景後頁有高江村二題極爲稱許外籤亦江村

題